

يوميات مدينة

مكسورة الجناح (طبعة أولي عام ٧٩٩١)

فتافیت فرح فرافیت هموم

أنا لما باحزن تعتليني الفصاحة..

كما ست فلاحه

يركبني هم البوح ولحن الكلام

الشعر يتعفرت على كتافى. طفل سعيد

يغويني أعري بلوتي ع الخلق

أو أفضح المستخبّى ف القلوب والخافي

من بعد م اخفی عَوْرتی بریش الیمام

تسرقني من شط نفسي مراكب الحروف

تتشر قلوع الخوف. تفاجئني

كما فجأة الغدر حين يكوي بكل حنان

أسبح على شطوط الوجع عريان...

أتعب فيغريني العشم. في راحة الموت الزؤام

حيث الهدوء التبيل والخطو الوئيد. شرط اكتمال الألهة

وعد احتمال الهمّل العبيد

أدخل بكيفي زمرة المناكيد

القلتانين المسكونين بالعشق والكره الفريد

»إخلع ننوبك وامتثل للرب يا إنسان

الآن قد فات الأوان«

حتي هذا ؟ يصبح جميع اللي حصل كان يا ما كان!..

»ما أنت إلا خاطره.. لاحت بريف الذاكره!!«

غيتيني من قهرتي.. يا غيه النسيان..

زهقت من الصراع

_ »إخرس. وكُفّ. امْسِك لسانكَ

أنت لست مؤهلاً منذ الرّضاعُ

إلا لساعات الخضوع.. أو الخداع. «!

وموائد الحرمان .. ؟ .. والأحزان

وذل النفي في الصحرا.. وآداب الخرسَ

والضرب سلم وحرب. بإيدين الحرس؟!..

- »إقطع لسانك وانس ما كان غدا.. فلقد غدا محض احتمال..

حتى ولو _ جلا جلا _ سمَح النظام «..؟

- »حتى ولو سمع ال... كفي لم يدرجوك هنا يكشف الحاضرين ولست بين المصطفين مقيداً..

فارجع وراجع بورصة الأحزاب

واسأل في سجل المنكرين الموعدا«.

خدها نصيحة وانسي يا بن الناس تباريح الهوي

وإياك تجادل حكمة الحكام

وكون رجع الصدي

حتى هنا ورق الحكومة اصدق من الإنسان

فتوب. عن اللي إنت عشت به أو مت فيه

ارجع وغرق جسدك المفري بسكين الوجع

في زحمة الخلق اللي ما عرفتش لحظة من الفرح.. باللون..

ولا حسّت في يوم حلم الشجر

ولا رعشة الألحان ولا وهَج الصور

ارجع وغرّق جسدك المهزوم إلى حد الشّبع

في ضحكة الخلق اللي ما قرَقت معاها الحرب. زي السلم.

موت الشمس كما خنق القمر

ارجع وغرق جسمك المهدوم طمع

في ضجة السوق اللي ما شبعتش م اللحم الفقير

في هوجة الكدب اللي مرهونة بمزايا

زيد وقع. عمرو ارتفع.

واللي حداها قلب. تلهيها البدع

فتحاكم الدنيا بقوانين الرصيف المتبع

ترضى برغيف الحاف وتحلم بالقمر...

يمكن يمدوا ف عمر قلبك الضعيف

يحرروك من حزنك المحكوم بحبك للبشر...

قد تستعيد حالة تماديك العنيد »الحُرّ « يوم

شهوة كتابة الشعر شقاف أو غشوم..

مهزوم كوش العصر.. أو.. راقى حنون..

محكوم بعلامات القيامة أو بآهات الفزع

اعقل يا وارث كل أحزان العبيد

لا تخجان أبداً من الجنونة يا مجنون

ما دمت صاحى وفيك نفس لسه ومالكاك الظنون...

فأنت قد ما كان، تكون

إطلق لجام القول وصمللة الفرس...

إمسك حجر مسنون .. جرس ..

دشه ف قزاز البترينات الخلق

»إعجاز النخيل الخاوية«

قش التقر. أو لاد حرام الهاوية..

إقلق رضا الصنور اللي مكسورة العيون

لسَّاكِ صوابعك قادرة على بدع الحروف أمَّ البدع

وعد التجلى بالفَرَح.. أو بالوجَع

بتحس لسه الحزن _ غَتي يا جدع

إنطق فأنت ما زلت حي ..

»لا تخجلاًنْ من أي.. أي

لسه في أحلامك نفس تلعب ألاعيب الفنون

لسه في قلبك نبض ملاعيب الهوي

في العشق هُمّ الموت يهون.

وإن كان على حق الوطن ـ شد الوتر

صلي صلاة حاتحور ولو شك وظنون. يشتى المطر

لملِم غيام الرعد يتزلزل »آمون«!!

لحظة جموح تاخدك إلى حدود الخطر

أبرك وأبقى من رضى عمرين سكون

حتى الجحيم والجنة. مرهون بالجنون أو بالسفر!

أهات الشيخ إمام الأخيرة

يا مفرق الأغنيات على قبر أصحابك

غنيت له فين ليلة التلات اللي فات

لحظة نده من حسرته محتاج لك..

ومد إيده في الظلام مشتاق لك..

وطبّ ساكت يعض الصمت بانيابه.

زي اللي كان جواك ومات قبلاك.

ولا كانش إلا ضحكتك في أجنابه

وضلك الهربان على أبوابه

جوع أهلك. دايس في صمت عذابه.

علي مهلك. بتلم فتافيت الزمان الماضي.

اللي ما زالت سايحه في دمها..

مكسور خاطرها ف نشرة الأنباء...

من همها نساومك على حقها

وأنت بتهرب منها للبتارين

ليلة التلات كنت فين؟!

ساعة انفرط فوق الحصير نفسى.. وأنا بانده لك!.

وما فيش أمل في رد أو إجابات..

إيه اللي جابك تاني قهوتنا؟

إحنا ابتدينا نعاشر الأراجيل..

وننسى هُم الصحبة. في المواويل.

كل التذاكر لها في الكدب قطر وحيد

كل الفلوس بتفاصل الأشواق...

كل الأغاني الحزينة في نهار العيد..

كل الأهات تصعب على العشاق...

إلا آهات الغدر وأنت سعيد ..!

ليه في رقبتك دين. وأنا نسيته..

السندوتش الفول على الترابيزة لم مسيته

بالضبط مطرح ما أنت خليته..

وقطع معايا. الشعر حواديته.

فر فرت وأنا قلبي في صدري حزين..

كل اللي بعته قديم جديد واشتريته..

ما يسوي رجعتنا في آخر الليل.. بنكح م الدخان.

ومطبقين أحلامنا في المناديل!

أنا مش ح اعاتب حد ولا نفسى..

راهنت شجر العود على أمسى ..

وكان لابد أقول وأنا خايف..

الفرحة حق اللي انكشف له الغيب

والصبر صنعة كل صاحب نظر...

ويوم ما كادنى الهوا عَز الدوا يا طبيب

على قد قدي . خرجت عن حدي ..

لا عزوة في الرجاله ولا في المال..

ولا كان بيدي أبدل الأحوال..

فقر الموسيقى رهتى ع المشاريب.

أخذوا بخاطري ورحلوا _ زمرة المجاذيب

الكلّ رايدك تشيل الكل عايزك ديب

تغنى للحرية وما تتكلمش

يا قرد بسديري قليل الحيل..

تسلى غفر السادة والمريدين..

يملسوا النسوان على دراعك...

في وجد حزين..

وتساومك الأرملة ع الباقى من شيبتك

الرحمة خيبة والغرام مش عيب..

عاشان کده کان صمتی مش طایق..

وغنايا مش لايق على المحاسيب

الثورة قايمة والنضال علي رجل..

الفترة حساسة .

فكِنّ إيدك قلبي مش حملك..

الكون على وسعه نقر ومضايق..

أتقنت فن الطرب في سامر الساسة

أراجوز على الحبلين ببال رايق..

عايق وخايب رجاي. بين عشق وسياسه!

米

اتجمعوا العشاق. وأنا لوحدي..

واتفرقوا الأشتات على الأشتات. وأنا وحدي.

كاتمة على صدري عتمة مواسم التهجير

ومراكب التراحيل..

من جيل يسلمني جيل..

وعجيبة إني فهمت كل اللغات _ وحدي . .

بالعربي نطقِت غنوتي الخواجات..

ياما كان معايا.. ورجعت أنا لوحدي

»باریسً بتشبه »حوش قدم « فی عیبیه

وغنوتي أشبه بتعب الفجر..

كما أتولدنا نويت عمداً لوحدي أموت.

ستدنى يا »عم كامل. « أطلع العتبة..

إذا كلهم رجعوا بورق التوت..

من بعد ما استمتعوا وسمعوا..وولتعوا آخر حجر بالخشبة اللي رجع ندمان إلى أرضه..

واللي اختشى خجلان على عرضه

لما انكشف غرضه اكتشف مرضه..

واللي مؤجل للقضا فرضه. وسايبها متطمن إلى النسيان...

ميادين مظاهرات الوطن مشغولة.

وجميع عنابر القلعة مقفولة..

الحزب جوّز ولاده لأمنا الغولة..

سندنى يا »عم كامل «.. أنِزل السلم..

قال بنت »شاهندة « طلعت ع البنات الأولى

وأنت العجوز المقرّم قرفتك معقولة..

برغم اللسان المطرّم فاهم الفولة..

_ مضطر أنام عطشان بلاش تفسير . .

فاتنى ميعاد رفع الأدان بكتير..

عايز أموت وحدي.!!

米

أشكر لكم حبكم يا سيدات الأدب.

أشكر لكم أحزاني يا أكابر..

أساميكو كانت على لسانى وحبيتها على الآخر

تطلع عليه الشمس. تنساني..

ويشاء سميع عليم يحميني بالذاكرة..

يغلبني ضعف البدن على نفس فنسيتها ما نيش فاكر

ماتشغِلوش نفسكم أكتر من اللازم..

كام يوم ونتخانق على التذكره

الدنيا مش ناقصه ولا عايزاني .

الخلق رايده المدردَح مُضحك القعدة...

أبو شعر أراجوزي وقميص بهلواني

ما يحطش المنشار على العقدة..

ويوم ما تسمح ظروفه يعمل الصالح...

يلهوج الحكمة بنكت وأغاني..

يفوز بعزوة شيطاني ورتبة إنساني.

كان كل قصدي الحياه تعرج على قدي..

جبروا بخاطري مكسورين الروح

جمّعت قلب المتعبين على بعض...

وزرعت بستان أغاني شبر يادوبك. في شبرين عرض سريري فاضى في ميعادي وراضى بسنتاني

أرجوكو من غير خلاف

ولا حجة للاختلاف بين أعمي ومقتح

تكفنوني في تراب ألحاني من تاني . .

وتدفنوني بدمعتي علي خدي. وتبخروا المطرح!

米

دي بنت مين اللي قاعدة هناك على السلم

وألا يكونش خيال؟ وعينيه بتشوّشه ساعه ما أتألم.

أنا خايف أتكلم

نص القصيدة كدب وقلبي ما حسوش..

إنساه ولف الباقي في سيجارة..

ما كنتش ضحكتنا بس اللي إحنا فوئتاها

أكتر صحابنا ما جوش..

الباشا قال لك بكل سماحه.. اتفضل

كُلْ حته من لحمي يجوز أنساك _ أمضغها على مهلك.

وأنسي وأناح اغفرلك..

العجز نص الموت. في أرض فقيره..

والصبر أرخص في الزمان المر..

والحرّ أبقى يجوز من الميت بشرط ما يصاحبوش..

أصل الخيانة هيه هيه القتل يا صاحبي..

قرش الحشيش أرحم من البيرة..

فارحمني لسه ف نفسي تعميرة

ع الرف. حبّة من طبيخ بايت..

ملعون أبو الدنيا ومقالبها

أنا كنت أكبر من مآربها..

مش رأسمالي خضع مجبر لمطالبها

بقى عمري أصغر لما حال الحال..

طيري ما زال بيبات علي السلم...

وعيبيه في الضلمه بتشوفني عجوز فلتان...

ودانه تتصنت في راس الحارة..

لحس خطوة ح تنكر إنها تعرفني..

أنا يا للى طعم الخجل من نفسى شرّفني

ونصفني عَ النسوان..

فضلت ماشى لآخر الصفصاف. خايف أخاف اللي مخوّفني..

فرحان قوي بحس الوطن في النخل..

حتى إما ملاك الموت حضر _ يخطفني

ما كانش عارفني وأنا فكرته

ساعه ما شفت البنت ع السلم..

وكأن كل اللي كان حواليه بعترته كإنه خيال..!

米

يا تري راحت لِيام الجاية ومش ح تعود..

والآلسه حتدوّخني المسافات ع الرزق...

أنا كنت فاكر الزمن بيعلمه الإنسان...

أتاريني أمي وأعمى هدّني النسيان..

ولا حد كاشف خوافي قلبي غير نسوان..

إن ولعت العاطفةأو طق فيهم عرق..

سلو الزمان اللي كان للشعر سعر السوق

حطوا لي في أي لقتة لمبة السلم..

متعمّرة وإلا ناشفة _ النفط غير الجاز

وقولوا لى آخر نكته ع الإنجاز...

في السهرة أقولها ف حضرة »الأستاذ ..! «

ما كانش ليه في السياسة كتير

ما كانش ليه حتى في العصافير

الحب إنساني أكتر لو حكيت عنه..

كان اللسان خوف م البكا بينصفني

وخصوصي وأنا جسدي متمزع بين المشاوير

ومافيش ورايا اللي ح يبكيني لله في لله ـ ويحميني ـ وبيته قزاز..

米

فهدي نفسك كل شيء هادي

بلادي لساها في طي الغيب

وأولادي أكثر منى قلته شوف.. وقله بخت..

وحارتنا بأولادها.. سايقه ف عنادها كسيحة بتشتم السلطان

وأكلها الحق شِحْته عض في لساني..

خلانى شفت اللى ما فهمتوش في مواعيدها

فنطقت وكأنى البعيد فتحت يوم عيدها

واهُه جه عليه زي غيره الدور أهر بدها

زي اللي قبلي وقبل مني كتير، فقير وارتحت..

تبكى عليه ولايا جبهة التحرير.. وتنساني! خواطري شاعر ماشي في جنازته إلى كل الشعرا اللي ماتوا على فجأة أو بدون وما لحقتش الدنيا تسمع غنوتهم ياللي ضاع عمرك مسايره للمسيرة أخرته فقست على عينيك الغِربّة عيشتها متهوم بفقدان البصيرة ومُت متسمم بأكاذيب الأطبّه آه يا بديل الموت أنا ف عرضك. كل اللي تتشرطه على ذنبي حَ استوفيه أنا اللي ياما عاندت هوايا صدقتك بدلت وقت الفرح مع حسرتي بوقتك »لا صوت يعلو. « كل شيء للوطن. للحزب. للعمال.. فلا أذيتك بكلمة جهر أو همسه و لا ابتليتك برأي وكان في يدي اخْفيه الحزن غصْب وكمد دوزنته في الموال

الحرن غصب وحمد دورننه في الموال بوهم إمكان أفادي مكامن الخِسّة لو بكره ييجي علي الوهم اللي عايش فيك لذا عشت أداريك.

على راحة الكدب صدقتك بقلب شاريك مع إنى طول عمري عارف أنى مقتول بك يا مدبوح بيك.

جاي لك أدق الباب.. من ورا ضهر العسكر

بقلوب الفتيات البكر.. وغصون اللبلاب..

وبكل ماح اقدر ألمه من أغنيات لها معنى في طفولتي

بحروف كل لغات الأرض ف أكبر ها كتاب

يمكن تسمعنى. وتعاود تصحى..

علشان الدنيا حطت في عينيها.. حصوة ملحة

وجت لك ع الطبطاب..

سمحت لك وأنت المولود الحافي العريان...

تستر عرضك فتموت لابس قبقاب !!!

米

إزعق وما تكتمش الاه.. اللي وجعت قلبك

من ألاعيب صبيان السوق القلاب

عبيد الملك الفرد العاطى الوهاب

خصيان الورق الكداب _ هاموش الأحزاب

قوم.. اتباهى عليهم باهِي بذنبك

وأعلنها بالفم المليان من قلبك.

أنك مع أنك نايم ميت. لساك واقف حى وإنسان

عاصى على النسيان

لإنك يا رباية الفقر القهر الجوع الحرمان

ما أخدتش أي نيشان..

وما سيبتش في دراع الدنيا ولا في دراع أصحابك _ عضة ناب!

بحر الدموع اللي في عيونكم. ح يغسلني..

خایف یغر قنی

كل العواطف تايهة عن روحها

والخلق مسمومه بدوا جروحها

ماتت مشاعرها ف ملامحها..

حين سلامت غصب زهر شجرها لرياحها..

فلا عارفه مين اصطفاها.

وبكل حُبٍّ حباها.. ولا مين مجرحها..

فرّحها كدباً. و هوّ ناوي يفضحها..

وف عز لهُوة فرحَها _ بحزني ختّقني.!

米

اتبسموا. وانتم بترثوني..

يمكن في آخر الدفنة تلقوني

بأبيع قصايدي. للى نكروني..

أنا بابكى حسره تاريخ أحزاني.. وسْجوني..

أيام ما كنت باشط في جنوني

بعد ما اتكفنت أحلامي.. في ظنوني

ولا حد منكم عاز يصدقني..

ولا يجاملني.. ولو... بالضحك على دقني فسامحوني..

米

كلّ منّا شايل علّ ته جوّاه. لكن الشاعر

علي قِلاته مسكين

شايل كافه علل المخاليق يا ولداه...

لذا تلاقيه في ساعات. يفرح بنواية بلحة أو حبّة تين

وساعات يزعل من عقد الياسمين

وساعات تكويه الفرحة. اللي ف سكك العاشقين سارقاه

فيخلط زي الأطفال. ما بين الحلم الحدوته والبنى آدمين..

يصعب دمعه/ حتى في ساعات اليأس عليه

ولما الكدب يعشش حواليه

ويشاركه في قوت أولاده ـ ولا يكتيه

ويحط عليه العين _ يرازيه ..

حين يستكتر فيه عقه على قِلّة زاده

فیحز علی رقبته حز السکین

عايزه يكتم ويداري الآه

يرقص في الزفه عينى عينك.. يا يخش الشق

يبقى الشاعر ما بين لاتنين:

يايحط على الجيفه مكسور الجناحين.. محسور متحاصر...

بالزور المتعلق في أرابيز الحق..

يا يتحامى بكلمة لأ..

ولو مرّه في سِرّه..

يتمزع قلبه المقهور _ بالعلل القومية _ ينشق!

البلد دي عمر ماح يجف بيرها

يكفي يوفي بق ميه وخص خوص

كل سبوبه ألم. تحبل بخيرها.

رغم أنياب المماليك اللصوص..!

هذا وطن للموت.

الحكم صادر ما فيش فيه نقض أو إبرام

المحكمة اتنورت من بدري واقتنعت

إن الجريمة أكبر من الأحكام..

قبل الدفاع ما يقلب الصفحة. إتبدلوا الحكام

وكل واحد كان مكبل بهمه

فشنخ في الجرح سِمّه.. دبلت الأحلام..

غسل بدم البكاري العتبة واستغفر

طهر وجع قلبه من الأحزان

استبدل الأعلام وألوانها

طرّم سنان التلامذه.. عرّي وجدانها

قالوا اللي فاهمين النظام الجديد

السوق بقوانينها

والإعلام بمحارمها ونسوانها

ما عدش فيها حرام ولا عيب في الاستغلال

ما هو أنت لو عشت ع الفول الحراتي تموت. بحمّي لاستقلال..

البنك هو الباب إلى الجنة.

والنفط للملكوت فاعلنها..

ديمقر اطية بحسب ما تحتمل أسرار

وربي دقنك واركب الزلمكة _ كل الغنايم حلال ..

الجنة ست ادوار بمنافعهم ـ فليه تحتار

النار ما راح تشبعش م الكفار

النيل ما عدشى بيشبه الكوثر

ولا الفرات عايز ـ بيستخسر

إذ قفل باب لاجتهاد منذ الخليل.. أوفر

الميه في قزايز. والميضنة أراسيمكو...

الحسنة بجنيه برايز.. يكفينا شر الربا والربح بالفايظ

حسب فتاوي السلف وشريعة التجار

السمعة ح تجيب لك أكثر زوّق المدنة

من دقنه وافتل له، يا تذله وتستحمر

أو تخرق الهدنة وتقاسم شيخ المنسر

إحنا ف زمان الغزو _ قط وفار

وكتت الأحصِنة حين كتت الشطار...

بس اخزي عين الشيطان .. لا الحسبة تطلع فاشوش

اقسم مع الخباصة والبصاصة _ الصنف كان مغشوش

أول ما تطلع روحه ما تجاملوش

وما دمت مستوفى زكاة المال ونسبة الدمغة

إقرأ عليه الكشف باللي انصرف _ وكفنه في الحال . .

الميت اللي غدرنا _ الرحمة ما تجوزلوش

إكرامه في دفنه خوفاً أن يقوم يصحي.

وأعلنها واضحة. إنك برئ من دمه

كم شلت همه رغم عيشته القرف...

ولا والسِّنش على قتلُه.

غير القاضى. والقناصة !!

米

هذا الوطن مجبر على الانتحار

خارج مسار الزمن. وشه قفاه للخلف..

ولاده فتلوا الحبال للمرة بعد الألف

وح يعلنو بين لحظة والتانية. شروط حضور الحتفال.

بالقلب بارد _ تشريفة العسكر...

وبقلب أبرد زفة.. التجار

ع الخشبة أزهار بلاستيك _ عيره شعر ولون ..

على اليمين المشايخ صف قبل الدكاتره

والإعلانات وأهل الهوي ع اليسار

والنعش منقوش بشِعر قديم من الجامعه ـ موزون مقفى

وشعر غير موزون..

وعلى الستاير

منمنمات من تراث فولكلور اليانكي حرب وسلم

وفي الدواير داير داير.. شموع والعه لتتر الفيلم.

على شبه خلفية فصحى من عُنعنات الكلام

وفي الأمام الأمام صحبة _ رجال العلم

نجمة غريبة بتلمع ضي مش مألوف

ما بين هلال مطفى وصليب معكوف

وعلى الحيطان والنواصي.. ورق الصحف قراطيس

طراطیر علی شکل قرن خروف.. »وبز « حصان..

تبرق وتلمع شغل أهل الثقافة. وهيئة التدريس

والكل شبعان وشاكر للوطن فضله

وبيدعي للفلاح بطوالة البال.. ليوم القيامة

فاكر مذاكر مقضيات الزعامة. يبل ريق الحزن يرضي السلامه يجلى الحناجر أو يسوق الأيامه

بسیجار هافان.. ونیسکافیه باریس

وأما يهل علي الجنازة العريس.. مهيب مقدس بطينه ورمّته وعبله رهيب محنط كما موميات زمان _ سلطان

تظهر مشاعر العطف والإكبار

ممنوع عويل الشعرا والنسوان..

هذا الوطن أدي دوره. بغاية الإتقان بلا تدليس.

برغم كافة ماركِبُه من ولاد أباليس

لا وقت عاد ولا فايدة من الإنكار

الدفنة راح تبدأ بضرب النار.. وقراية القرآن على المتاريس..

على لحن نوبة رجوع خمسة يونيه. بالسّاكس. والفانفار!

米

يا هلتري. أقبَل قصايد العزاء

وارضى بتعاطف المجاملة في غباء

من اللي شمَتوا لما ريحتي كمْكِمت.. فاحت

وجتتى على ضفتين النهر.. كشفت سترها.. وباحت..

ازاي ح أطيق إني أساوم الندم

أغفر لمن بالقصد بدلوا المواسم

وجهزوني للهزيمة وللمياتم.

حين رتبوا مواسم لاعتيال بدون ألم

حاصروني بين العادة والجنون

واستندلوا في خدمة العلم

الله أكبر _ يا بلادي استسلمي

بعض الهزايم فيها شبهة انتصار فاتعلمي

لكليّاته علّة في الطبيعة سلّمي..

لكل مرحلة وجيعة

فقر الشرف. ترف.

العصر بدل علاته وعدل الشريعة

فاستطعمي حلو الليالي ف مرها

لا ينقذ الأوطانَ. إلا كسرها. من جرحها يتفجر الألم

الآه. بشارة للحياة. أو للعدم

دمى نِشف في عروقي جف في القلم

أقنعنى يأسى بالقرف. يوم ما اقتنعتى بالانتحار...

米

لذا مش راح أحضر حفلة التأبين

مين فيكو قدي وقد حزني. حزين..

أنا اليتيم اللي انتي كنتي حمايتي

دنيا ودين داس العدو على رايتي..

من يوم ولاد الكلب ما حكموني

وسحبوا منى عمد حق و لايتى..

على قصيدتى وبيتى وغنوتى وآهتى لقمتى وجرايتى..

أحلامي صمتي كلامي ولحن أحزان ربابتي..

وعدوني أخاف من غربتي في بلادي..

واتوالسو ويا أولادي علي نهايتي..

زرعت شجر الرفض في قلبي. رويته غشمية بقد جهالتي..

ضلل عليه وضلاني شحيح الزاد

ضروري آخر المتمّة بالأكيد راح ألاقي..

شبرين في شبر لنهايتي. في قلب طين البلاد..

لذا مانيش ح البس تياب الحداد

الحزن حق لعسكر الجلاد..

مش للى والس نفسه على موت الوطن

فلتخسأوا علناأنا باعترف _ مل يت ..

ومن ذنوبي خطيتي كلسيت

رضيت بُلُل اللي كبّرني _ فصعّرته..

قدمنى على نفسهِ _ فأخرته

سقاني ماء الحياه الحي _ عِطشته..

حرمت حسه الصبي من حس مواويله

أفسدت ليل حزنه _ فأبكيته ..

قطعت فروة حضوره غيابه حتى زهقت

خرجت اتنشق هوا بكره اللي فاتنى ـ شرقت . .

أنكرت منه حديث الطمي والأشجار _ فكنبته . .

بادلت ضحك الصبا بالضحك على شيئته..

حتى في يوم الجنازة من فراغة العين. لبسته رسمي بكل وقار غسلته عطرته وحقطته.

صليت في حبه وشِعري بيكوي في جروحه..

وقريت علي روحه بكل إيمان وكفرّته

أتارينا جمعاً جميعاً كتا يا ولداه

كلّ يغني بكل رضاه علي ليلاه...

برّ أنا روحنا ف متله حِينا على كعبه

غفرنا ذنبه وسكرناه بأناشيده عيشنا عبيده لحد ما كرهناه

يطلع علينا إله فرعون في مواعيده..

والكل على كف ايده نمل يا ولداه.. بنقطع هرابيده..

اللي احنا فيها وف يوم عبيده. كقناه!!

البلد دي. بيدي ليه بيجف بير ها. ؟

مرّ بُق المية. كل الخضره خوص

الألم يطرح ويجنى خيرها غيرها

والبنات حلّو الضفاير له اللصوص..!

رسايل للبنات والمشايخ

```
١ ـ دو.. ري.. مي
```

ياضي العين. والنتي.

يا بنتوتي.. ومحبوبتي.. وأمي..

قاصدينك راصدينك. زي ما راصديتي..

علشان بشرنا صبايا العشق بعش الحب. ودبل العشاق..

فطلعوا للشمس معانا على سلم نغم المزيكه وتناغيم الألوان...

وآهات الشعر وتقاسيم الأشواق

مجبورين الخاطر من جب الغلب الأزلى الختاق

علي وش الدنيا بالفساتين الفرحة حرير...

بضفاير حره في النسمة تطير...

بقلوب تشهق. تنهج وتفرفر زي قلوب العصافير

دو.. ري.. مي فاصولا لا.. دووه..

يا خلق يا هووه. الموؤوده نفضت عن جتتها الرمل.

غسلت روحها من قهرتها

المدفونة بالحيا زفوها لحريتها

المكسورة الخاطر .. ملكِت بيتها ..

بإرادتها بتقرا وتغني وتشوف. نزعت جلد الخوف.

واحد زائد واحد _ أكثر من مليون

إتلوّني يا زهور يا حروف. أحلامنا بوسع الكون.

نقدر نملك بكره مسافات وعلوم...

لو نكسر سم اليوم ونهش البوم..

ونغنى بكل لغات العالم..

للخبازه العجّانه النسّاجة الدكتورة الرسامة

الفنانه اللي بتحدد أبعاد الصورة..

ترفض وتحب وتختار

وتميز بين الفكره الدون الحمضانة

والفكره اللي ترّهر فوق شجرة بكره نهار

علمها زمانها الدون الصعب

ما تسمحش لراجل مهما يكون

يسرق منها غير النوم

لو يوم يأسرها بكل إرادة حرّيتها _ الحب!

米

٢ ـ طلع البدر

»طلع البدر علينا!«

م الشوك اتفتح ورد الإنسانية.. على إيد الشعرا والأنبيا..

لكل الأسياد غصباً من خبز عبيدهم

خرجوا بناتنا على إيد الشطار من قفص الغول

يا سيدنا رفقاً بالقول

لا الجلابية ولا الدشداشة ولا الريالات

هي اللي سترت هر ابيدنا..

اللي وحدنا الترتيل التنزيل الصلوات..

الأراغيل الأراجيز الربابات _ والمسرح.

التواشيح الآهات _ والمواويل..

اللي طول عمر ها دفا غربتنا ف برد التراحيل..

الشمس اللي بتو هوج بالحب ف صيف النيل

واللهي بتتخلق حَبّ ونبق وتمر الحنه وتيل

يا سيدنا. ليك أخوات وأمّات.

الآتى بيتنسم ريحة ما فات. فيخيل بالصورة وبالكلمات

آيات من صنع شباب وبنات. لوحات.. ومسلات وسواقى وتماثيل..

يا عيني يا لا لا للتي.. يا ليل

فإذا »المؤودة سئلِت.«

ردت خلاخيل الخيل.. زغاريد وصهيل

الرب جميل وحليم. والحب نبيل

نفخت روحه في بطن الأرض اهترّت..

للألوان الأنغام الأحلام الأزهار والأفكار التقاسيم.

لهسيس الريح وهدير الموج ورفيف الطير

لزقزقة الأطفال. ولأحوال العصافير...

إخضر الشجر اتلون طاب..

جَت للبنت الطفلة للقمرة للشجرة على الطبطاب

سبحان الله سبحان الوهاب.

نطق الوتر الجلد الخشب العجب الحجر الغاب. في إيدين فنأنه

اللهم اجعله خير.. بقى خير

كان قادر يسخطنا قرود وحمير

لكن الرحمه دليله لإنسانه. جلّ لسانه وبيأنه

إيمانه يرتق وجدانه. يد وزن ألحأنه.

ويقدّره بالروح المتجسد فيه. على سجّانه. وقسوة حرمانه.

ليه أنت لوحدك يا سيدنا _ بجد الجد

عاقد القسوة على قد جبينك

ليه وحدك يا سيدنا وكإن قتلنالك حد

رافع ع الكل عصايتك ما إحناش عاجبينك

رايتك سيف مسنون لرقابنا حد القهر

يا شيخ اتأمل شكل الوردة ف ساعة العصر

أتصننت لغناوي الطير

وأنت بتتمشي حوالين القصر وغرقان في الخير

انظر في مرايتك واتذكر حنية كلمة مصر

فكر واتدبر _ الله أكبر _ لا تتكبر

تلاقیك زیب وزیه وزیها ـ بنی آدم مش أكتر

لك وش ولك ضهر . ضعيف وفصيح

ومش ح تخلاد أبد الدهر.. مجرد ضيف..

مثلك في الدنيا مثل الملايين اللي بتلهد.. ورا نص رغيف

زي النمل وزي النحل البنى آدميين بلا حصر

شايفنا زي ما شيفينك.

عارفنا يمكن أكثر مما عارفينك.

يا سيدنا.. الحق صريح والكدب علي النفس قبيح

فقول لى بالحق:

يا هلتري وأنت بتتأمل ما جري ـ قدّام أو ورا..

خايف على دنياك _ والا خايف _ من دينك ! ؟

٣_ الخوف

في بعض بلاد الناس..

الخوف لابس زعبوط بنت بنوت.. بدقون حرّاس

على جبّته سبحته نبّوت

الأرض الكرويه بتشرخ في ضلوعه..

تقطع ريح القرن العشرين في قلوعه.

عياره الفالت بيغير ملامحنا..

بعد علينا الأنفاس ويرجعنا لمرجوعه

رفقا بالقوارير يا سيدنا. ما احناش إحناش وعقارب.

استغفر م الوسواس الخناس..

رحمة ربنا مالهاش على خْلقُه شروط

والنفس المهزومة عمرها ما بتبنى بيوت

يمكن تكسر مقاديفها بإيدها

أو رعبامن ملك البحر تسلم أطفالها للحوت

وتعيش طول عمرها ذنبها يجلدها

ترمينا ف طوعه دراويش

نحوج أغانينا لمشروعه.. وتحريفه

نعوج سيرنا لرغيفه

ونعدل خطاوينا على كيفُه

نسلم ريفنا لتخاريفه

تراحيل للتجار تتهجى حروفه..

من قفر الصحرا تدبر مصروفه..

علي طبق الفضية تقدم له اللقمة السّحت

الهدمة الخيش

حرافيش بتبيع أغراض الدنيا بحسابات الآخرة. لحرافيش..

تساوم الشيخ الكار منجى على خشب المنبر

والسمسار الأكائنجي على شنب العسكر

والشاعرع المنكر

دفاعا عن حق النفط ف تزييفه..

سبحان الله في تصاريفُه

اتعكر نهر الكوثر

انقطعت شعرة أبو سفيان

اتكسر خاطر قلب الريفي المتبندر

زي العشاق العَجزة في الحواديت

اختار يرجع م الهجرة مستعفى بغناه

متكبّر على لحن غناه..

متكدر بيكدرنا معاه

كاره مواويل الناي واللون الأخضر.. سارقاه.. سكينة مولاه..

رضعت أحلامه من أوهام الزمن الأغبر

الرمل الأصفر نسّاه.. كرامات العرق المالح في الغيط

انعدم الشوف

لمّا الأمرا بنوا له قصور في الجنة..

طوبه من فضه وطوبه من خوف!

```
٤ _ أسـباب
```

بتقول ضاعت منا (البوسنة) يا بيه

لما رقصنا بالية؟

وراحت (غرناطه واشبيليه)..

لما عرفنا التواشيح الأندلسية والمواويل الشعبية؟

برّيه _ على رأي الست الوالده يمسّيها الخير

طيب اشرح لي (اسطمبول) ضاعت ليه؟..

وليه. (حيفا).. (وعكا).. (والقدس) العربية؟.. وليه..؟

ليه اتقاتلوا الفرسان في (أفغانستان).. اسم الله عليك وعليه..؟

ليه قايمين الأخوه على بعض إمام وأمير!

ليه الواحد منا بيتشطر على أقرب بردعة..

وبيباك لقم السحت النيه جمر ومسامير

ليه على قلبه المسلم ريالات النفط الخام قناطير

وأخوه المسلم على صدره الهم أكوام؟

علشان (شادية) غنت للعشاق العرسان.. شباكنا ستايره حرير؟!

و (سعاد حسنى) كلبت الشوكلاطة؟

و (سمير) بيقدّم للأطفال فوازير؟

والا عشان الشعر كتبناه بالعامية عن الأشواق والأساطير؟

وعشان الأطفال لبسوا في العيد طراطير؟

لعبوا ورقصوا وغنوا وضربوا بالصفافير؟

واستبدل أجدادنا خَرْمشة الريح في خيام الرعيان

بحيطان منقوشة من حجر الصوان؟

وأولادنا خرجوا من الكتاب..

واستبدلو مُقرعة الشيخ (مسعد).. بالألتو سوبرانو...

والقبقاب ببيانو.. واللوح والكوبيا _ بتشيللو وكمان. ؟ _ يمكن..

أصل أنا على قدي قدام ألاعيب التاريخ الإنسان

قول لى يا سيدنا وفسر لى ..

ليه أسبانيا ما ضاعتشى من الإسبان/ الكفار

برغم ساحات المزيكة والرايات الألوان..

وليالي المسرح وجنون الرقص الجسد الحر

الأسطوري المرمر والعريان...

وليه اليونان الوتتية _ ما ضاعتش لحد اليوم..

من إيد اليونانيين/ الأحرار؟

米

٥ _ الجنة ألوان

أقدر اتصور عالم من غير أشجار

بكفاية صبار الصحرا.. بديل للخضرة..

حتى النخل الأغبر ممكن نعتبره غواية..

ح ارضى بالتمر الناشف والجعضيض والجمّار...

واقدر أتصور بحر بدون أسماك..

يكفى البشرية من المية يدب على شطأنها المهجورة

القوقع والجندب واليربوع

إحنا الإنسان _ عمر ما خوفنا الجوع

حَلَبنا بالحنية الحجر الصوان...

ولتعنا في عز الضلمة النار المسحورة

دوسنا ف قلب الأشواك علشان نرسم صورة

مع ذلك أقدر اتحمل عالم من غير الألوان الطبيعية

الرمل الأصفر وسَفَاه الأغبر ممكن يملا عيبيه

الأبيض والأسود ممكن يصبح فني.

يقدر يخفى عنى ويخفف هَمّك يا رمادي

لو كان للذل ضرورة في الزمن الكرب

أو صار للغربة أحكام

كل ده لو ممكن/ عادي مع أنه معادي _ لكن

إزاي أتحمل عالم من غير (السمفونية السادسة)..؟

وموال (ناعسة) و (إيزيس) (مختار) وباليه (جيزيل)..؟

وزهور (فان جوخ) وجمال (الواسطِي)

وعيال (البهجوري) و (حجازي)..؟

إزاي أطيق الدنيا من غير أنغام (الشيخ رفعت).. لما يرتل إقرأو الرحمن؟

أو من غير الأحلام اللي بتملا إيدّيه لما أقرا فؤاد حداد

إزاي أحسّ العيد من غير ثومة .. ؟

وإزاي يومي اليومي يعدي

من غير مقامات وقدود العود وحكاوي نشيد الإنشاد

وهويت الشيخ (سيد) وأهات (فيروز) إزاي..؟

لو قلبك ناسى.. ارحمنى يا مولانا.. ربك غفار ستار

خلق المزامير.. سوّي التايات والأوتار ـ ليه هذا الإصرار؟

تحاصرني بعذابات القبر ولهاليب النار

عاطى لنفسك حق المنتقم الجبار

وكإنك متأكد جداً من شكل وحجم جهنم!!

طب مرّة إوصف لى الجنة..

من غير الألوان الأنغام الموسيقي الربانية/ الأحلام الإنسانية/ الحرية؟..

_ ح تكون إزا<u>ي !</u>؟

النيل ما ينساش عياله.. عند ما بيفيض

»ثلاثية عن الإبداع وأشواق الفن والحرية!«

إلى برزي النحال ويوسف شاهين

ونصر أبو زيد وفرج فوده

محاولة للاعتذار وصلاة لمطر الأمل!

لما قلمك لأخرس..

يقدر يعلن حبه رغم حصار الغل.. بألف لسان فنان

يتخطى حدود الموت في قفص الذات...

يتحدى عيوبه/ أو هامه السرية. وعجز الكلمات

يتجاوز مساحات الرؤية.. ومسافات الألوان...

ينقش هلاهيل الخلق الهمّل في كراسة قلبه

يراهن ألاعيب الدنيا على حواديت شعبه

ساعتها ح يصبح ذنبه في عرف اللي اتمنوا هروبه

إن غيابه الحاضر رغم مرار الصمت. بشري أكيده بحضور المواويل.

وإن حضوره الغلاب وهّاب ونبيل..

```
علشان على قده لقى القدرة
```

يتحدي زحف الصحرا على الخضرة..

لا رهن الأيام الحلوه للمرّة..

ولا خبر الأحزان على وهج الأحلام الحرة

ما ساومش الخطوة على المشاوير.. ولا الغنوة على الأوتار...

و لإنه أقلية وشديد الندرة.. ما قبلش التعديل

وأما بقي الكون مأزوم.. قدم قلبه بكل بساطة للشمس بديل..

ولبكره دليل..

وعاش محموم بالتفاصيل..

بأهات المواويل المتعبشة في زحام المخاليق

بين الويل العشق والليل الضيق

مهموم. يعصر قلبه في كاسات الحرية. لجل يبل الوطن الريق

حتي وإن طب قتيل

مش حيموت مهزوم..

ولا قِلَّة

لأنه خط بدمه وصية أمه في كتاب النيل..

米

على مدار الزمن

طفل الوطن أنت

بعض الأمل زادك.

بينسبك لأجدادك.

ويسلسلك لأولادك.

حتى أما خابت في التاريخ أمجادك. النفس مش مكسورة

ليها الحضور كله في يوم المحن..

لها جميع الموانى في زمان الغياب

تغضب وتكره تتقمص.. وتحب

طرح الشقا عنات ساعات الرضا

قوم فرق الكراريس علي الأطفال تشهق في حصص الرسم

تغرق في بحر التاريخ يغويك ندا الجغرافيا للترحال

تخاف في درس الحساب من جُبر راس المال

لكن ولا مرّة لما الموعودين نادوا.. زوّغت يوم المظاهرة..

أو غيبت لما أعلنوا الإضراب..

كنت الندا.. والصدي.. لايق بكل النقص للإكتمال

شرع الحرام قادر.. بيغوي الحلال..

القبح طبعه أن يهين الجمال..

فيكون زمن ألعن. ما تجوزشي فيه الراحة.

لذا أعفى عنى وسامحنى.. ما أقدرشى أغنى بصراحة..

حروفي عضة في لساني والأدب أحسن..

فطمئتي فلاحه لما اشتاق لها بأخزن.. حاسس مرار الفرحة منقوصة

لسه وإحنا ف آخر العشرين يا محروسة

بنحايل الضى لجل يجود ببصبوصة

والكل حامد وشاكر فضل أهل الدين

صار الزمن غير زمن والمحكمة بالتص

بِثَقَصٌ أرواحنا بين القاضي والحجّاب

إذ كل جرح بتمن واجنحتي مقصوصة

كان نفسي أز غرط بكل حماس واتملعن

واتباهى فرحان باسمك شعر يا ابن الناس

لكن لاهيني على عين الوطن وسواس

كتر البكا علم لساني النوح.. والشك عودني على الوسواس

ساعة لمحت عدوي في الساحة.. بيعْزم عليه ببوري تفاحة!

ضلوعى باتت بشوم الرقص ـ مرفوصة

وانشق قلبي جروح أحلامي ممصوصة..

مش قد حزني البوح.. والفرحة زي آمالي قصقوصة

جتت بلا روح..

عسكر علي كافة منصات الوطن مرصوصة..!

米

خارجة الحواري اللي بتعرف تقرا. مع اللي ما بتعرفش بتغني.

تحلم بإيه السبايا في قسمة الأسلاب

الغزو حصل حشا قلوبنا.. وحُلق الباب

رماني في الحي القليل الضل

إيه اللي ح تقوله وردة في زمن كداب

فرحان بزهر الهالوك. حاكماه كلاب السكك

بيعد لى ما استطاع من قلة التصفة

غِل وغتاتة وجهل بياكل الألباب..

أمم عديمة الحساسة. حافظين أصول الخساسة.

خيالات مقاتة وخبرة في الكلام السياسة

من الرجال القش والسّاسة منعمين ناعمين. ومدجنين خياب. عمداً ء وعمدا.. ودكاترة مفكرين نواب أجسام بغال عرّها في حلم عصفورة أحلامنا ذل ف إيديها الكتع مكسورة هِربْت تايه بشيبتي ف سكة الأطفال أجمع شتات الصوت على الصورة دعوة ولية ح تطرح توت وبندورة يمكن يحل العيال العقدة في لساني يشرح لى صدري أوزيريس اللي ربّاني يطلق حصاني. على شطوط الوطن. تاني أملا حفاني أغاني. من نبع عكرة بحرك المواويل ما هو مستحيل/ أن أبويا النيل يخالفني ويخلى بيه يخل فنى وينسانى!؟

ما الحب إلا للحبيب »الأوّلي!«

وكإنها المنصورة.. أو مش هيه »الهوارية « العايقة في التلميذات.. أم الرموش عصافير علي ميه يوم لوعتني عشق بين التلامذة دلتني من قبل الحروف ع الهمزه.. وجت عليه.. أنكرت ألحاني.. تنده وتنكر أن صوتها ناداني..

فشردتني علي جسور العصر

عشمان أضم في حضني بندر مصر.

بحري الصّغِير ما طايقش يفرح بي

ولا نخيل السباخ.. راضي إنه يطرح لي..

ما عدشى إلا العشم مسافاته تسرح بي

يا هلتري من بعد فرقه تلاقي ؟

وألا اللي مات أندفن يوم قتل أشواقي.. دبرّني يا صاحبي

كرم العنب شمتان في دمع عينيه

عُلقم حلاوته وطال على إيديه

ما قدرتش أوفى ميعاد الحب يا شلبية

أتوزع القلب _ أشلائي على أوراقى . .

كان حبى أقرب من ألف بائى

وحجتى.. من صنع أعدائي

لو إنى يومها حفظت أسمائي.. كنت بهوايا هربت م الداورية..

ولا كان عوج سيرهم غدر بيه.. ولا بدلتني في الغرام أهوائي..

النسمة محبوسة في ورَش خرسا _ غباوة الجدران يتجرحني..

كدب وبواقى بشر وكلام ما لوش معنى

على قهاوي الثرثرة لقدني..

في الحرب نار الذكريات تلفحني..

طايق أدور في السنين على مرسى مش لاقى ..

لميت فتافيت الليالي البيض. أطبع صوابعي على البيان بالخمسة.

أحلم ببنت الجيران اللي ح تكبر استه

يجوز راح أنسي أنها نسياني..

وعزيزه نازلة البحر فجر العيد

تسلق عشاني البيض في شم النسيم

فاكره الفرح يقدر على السجانة

قفلت في وشي جميع موانيها

قتلتني. دمعة حزن في عينيها

أنا قلت أعيد حدوتتي وأغنيها

ما لقيتش بلدي اللي اتحسدت عليها...

اللى اليهود باسوا تراب رجليها

وبرعبهم حكموا الحصار حواليها..

أنا مش نبى بالصلا والصوم أنجيها

صدقنی ولو مرّة یا خالی »سعید«

مش دي اللي كان طميها م القمح خلّقني

وكنت أخاف منها واحاجى عليها

سبع سنين في السجن أناديها

وسبع سنين منفى شوقى ذاة يحرقنى

غاية المنى صدفة أمس إيديها

أحضن برمشى مواسم البرسيم. عسى تميز غنوتى تلحقنى.

وكإنها المنصورة مش عمري

و لا قمر ها اليتيم الشتوي كان قمري

ولا شادر الكفر القديم داري

ولا خضرة البحر الصّغير مشواري

ولا هتافات التلامذة فضل من أشعاري

ماتت عصافيري ودبل شجري

قطعتى ليه توب الفرح يا سعاد؟

أنكرتي ليه إن إحنا نشبه بعض

داريت هواكي عن اللي حبيتهم في غير دي بلاد..

لما التقيتهم باسمك يعشقوا غيري..

ويا يحكموني قهر باسم الهوي. يا بالهوي يتحكموا ف سيري.

حزني استوي وجراحي أخفيتهم

ومشاعري خوفاً م الحرس خبيتهم

شح ف بلادي زي غير ها الزاد.. والضحكة ببريزة

وخديجة زي مديحة. زي عزيزة الحلم زي العلم صار دخان.

والحب مستعصى على الألحان

الأرض عاجزه توفى مواسمها

كفرانة حالفة ما تطرح إلا رماد.. وضل أسياد

وناس قاتلها العطش للعدل وتخبى أن ليلها سواد

الذكري تنكرها على قلبي.. وكأنه كان ذنبي

تسلط ابن امبارح القارح.. ينكر عليه شربة المية

يحكم عليه أعاشر الحية

وأبل بزلال دموعى رغيف حلال الزاد..

وإحنا اللي كنا لبعض حضن زمان..

أشوف قمرها على السكك مهجور

وشجرها متقرطم وحوشها بسور...

والجامع الأطهر من الدكان..

فرش البلاستيك وحاكمني بميت قاضي

رماني علنا بسهم الماضي كقرني.. بنص لسان!

صليت لأبويا النيل يجوز يحدفني..

على شط عارفه وضفه تعرفني..

تحميني من سوء الظنون. تسعفني.

من بعد عِشقك صبايا زمان ما فر هدنى

يمكن زهق أو تعب ينصف ويو عدني

يجبر بخاطري ومن غربتنا يلقفني..!

فرحت زي المهبولين بالتوتة

أول ما لمست إيديه شعر بنوتة

برغيف حنين حنون من فرن ستوتة

بلسان بدأ لى أول الحدوتة.. نجاة وزينب زهزهان وبشاير

ست أم فهمى السيدة ورسمية _ وطنية أم الضفاير ..

یا قلبی دایر بتشحت همسکة حنیة

القمرة غايمة في سكة ملوية..

والنطرة فوق السطح مستعفية

على بال ما نمت نسيت أساميهم كإنى مش سهران باغنيهم

صحيت لقيت فيهم مكفيهم..

النجارين طافيين مناقدهم..

والفلاحين هاجرين مقاعدهم

ضاع مني أهلي اللي باهيتك بيهم

والدنيا شبعت من رغيف أراضيهم واللي اليهود فتلوا الحبال لأيديهم وجميع بنوك الأرض حالفه عليهم.. شرقاً وغرباً تجازي فضلهم بالموت إذ بدّلت في أوداني لون أغانيهم ف عيني خرست زقرقة سواقيهم عجز لساني أن يواسيني..

بعد السنين دي كلها ف ملاقيهم مانيش لاقيهم أهلي اللي حاف فقرهم ع الطهر عودني صار قهرهم عاري يلودهم. يكيدني ويعريهم سقفي الوريف سوس. أسقط جداره الخريف والبحر أنكرني

ينحرني يوماتي كل ما ذكري تثهرني..

خوفاً لصدفة لقانا الخوف تحرّرني

لما الغيطان الأولى تتذكرني..

قالت عزيزه ليه تفكرني ؟ عجّزنا ياما وصار حدانا أو لاد..

لو كان غرامك صدق كانت صندقت المواعيد!!

دي البوسه كانت للسما تطيرني..

وكلمه زي العسل تملك تسهرني..

وقرش تعريفة يوم العيد يخضرتي..

كل إما يخمر عجين ع الفرن تحضرني

يطلع علينا زمان الخوف بهم جديد.

إياك تبص وراك وسترني. ما عادشي منها رجا.. ولا حد بيستناك

لو تاني تخسرها ح تخسرني..

اللي قطف عرضها.. عالتمرة حسرتني

حالف اكمّل مسافة حزنها عريانة

عَوَج لساني وجبرني أرافق الهجانة

حاصرني بالأمرا وبالسجانة ورقص بهم على جتثي فرحان

لمونه دبلانه لكن في بلد قرفانة

قصده أسلم لهم وازحف علي بطني

أنا اللي ماقدرش أشطرهم يغلطني

ولا جيوشهم حديد ذرّه تحوّطني

بادق بصوابعي عشرة على باب اليهودية .. ؟

أمون عليها يجوز ترحم وتغفر لي؟

تحط لى الشّشم القديم في عيبيه

افرح واضحك على البدوي وع الأسري..

وارقص لبكره وأنا بدائي القديم عيانة..!

ولمحتها المنصوره مش هيه

غيم ع السكك وغباوة في الأحلام..

كل الزمام طالع على الزراعية. بيودعوا بالطبل والزمامير..

»الهوارية « اللي كانت عزوتك يا سمير

بيوصلوها ح توفي الوعد والمكتوب.

على حائط المبكى تبكى كُثر ها المسلوب.

وعمرها المنهوب. قطر الندي والطعنة في قلبك.

على المفارق شافتنى قالت لى يا حبوب

ارجع يا واد يا غريب. طول عمره ربك يا ابنى رب قلوب

مسكتني من علتي.. قادره. وح تقنعني

بأنه وحده لوحده الواحد المعبود

وإحنا جميعاً نصاري ومسلمين ويهود. متزبطين علي سِنجة الألحان بالعامي والفصحي أوركستر وتخت وعود

حَلَب سودان أو يمن أشكال أمم. حكام. مغاربة كرد وشوام

بحاروة قبْط وصعايده ـ الجودة بالموجود..

حرية ديمقراطية تكره الألوان

إلا في شكل الصليب والجبه والقفطان

لأنه ديان وحيد وزعنا على الأديان...

ترضى!؟ ح تكسب أكيد

إذ كل شيء مرصود. لأمة التوحيد.

دنيا وآخرة العز في الحسبان

نعمة وملهاش حدود.. ما دمنا نفضل جنود

تشريفه تحمى الخليفة وتدعى للسلطان!

بعض الهزايم فيها شبهة انتصار »إلي عمدة النظام الدولي الجديد«

عايز اعترف بهزيمتي. قدام حضرتك هذا الزمان أبو ودن واحده ما عادش طايق غنوتي.

الخرُسْ أكتر من حشيش مصرف »حادوس«

الخرم أوسع ياما من حلق القادوس.

الطبل أعلا من صويت الخزيانين يوم دَخلتك

واللى اندبح ما يحس قرصات الناموس

الشوك لجام.. زهر في حلق الخلق نور جبهتك

والخوف حزام. عصر قلوب الحزن رتة ضحتك

فضلات سيادتك في صحاري فقرنا الوطني غموس

عسل وتين للمكلوبين ع اللقمة في جمر الليالي

والعشمانين في رحمتك

يا صاحب الفضل اللي كان علي جثتي.. دوس جزمتك

جنة رضاك علي إمّنا بتضمن لنا فرق الفلوس من بورصتك

أنا باعترف..

إنى عرفت القدرة ابص ف خلقتك

لا عاد لى في الطور الطلوقة ولا الطحين

ولا ليه عين بعد اللي كان متى أواجه نظرتك.

أنا باعترف.

عاجز أميز أو أهن جبلتك

هدَم ابن أمى المندرة وشد اللسان المسخرة في محبّتك

ورمانا في الماكة نصلي

نخش أفواجا _ زمر _ في ملتك

يا ابن الأنيته يا عبقري يا فرطاوؤس..

من قدرة الفول الفقيرة لزبدة العجل الجاموس

منا الرضا.. ومنك تكرّم بالقبول.. أرض ونفوس إتظهر الشيك البياض على ذمتك..

صبح تاريخ جنس العرب ضل لتخاريف أمتك

واحنا الموالى الذمة والأجناد وأحفاد العبيد

وأنت النبيل الأصل متنسب لأهل الهمة. بحبال الوريد.

دانت اللي نجيت الرشيد

وأخذت بإيدين النبي ف عرْكة أحد..

إنت اللي رتبت لصلاح الدين إيراد القدس. وحجارة رشيد إنت اللي وحدت البحارة على الصعيد

اخترت نصرة عيسى ورفعته على خشب الصليب

هَدِيت أساطين العرب والمسلمين

يوم السقيفة للخليفة بالأصول

صديت جيوش بونبر طة عن عكا. وضحيت بالحسين.

عاشان يكون لأمية تغيير الفصول..

وأنت اللي واسيت ستنا زينب وخففت الحمول

عن قلب مريم البتول..

وهدمت قبر لينين. هزمت المنكرين البيعة بشرت. بيزيد رجعت للاجئين خيامهم من جديد

أمّنت لشيوخ الإبل والنفط أنعامهم وأغنامهم _

ولخادم الحرمين أمان العرش والوطن السليب..

وحدت ع الإسلام بلاد الكرد واليمن السعيد

هل من مزید!!

```
ما انتش غریب
```

إنت بحكم شريعة السلف الأريب

أقرب من الحق المريب

أوْلي من الموت القريب

أنت المؤهل للمثول الجل الشفاعة ساعة العرض المهول

تشفع لكل الخاطئين العاجزين دنيا ودين

المر فوضين من كل أبواب القبول..

أنت اللي بالحق المبين ح تفلّ وتحلّ الحديد.

أما أنا _ اللي كفرت بيك وبعزتك عمدا _ فللأسف الشديد

من قله العقل البطئ الفهم مشلول بالقديم

قدام ظنون البحر وجنون الرياح _

محسور محاصر باختلاف العشق ما بين الفصول

بين مد جُزر وجد هزل..

أشهرت سيف الفقر صارم ملتزم جدر الأصول..

ونسيت بإن جدودي من أجل الوصول لحضرتك

باعوا بسبب الفقر والهجرة. صكوك عتقى ـ سلاسل قهرتى

مَهر ورشاوي سمسرة من أجل مدّ خدمتي في خدمتك!

الشمس كانت في بلادنا شمس. للي في عينيه بعض النظر

كان الخريف ثابت خريف..

والحق نور والكدب زيف

شكل الشجر زهر وفروع مترتبة. خضرة وجذور

الشر زور

كان البقر في الغيط بقر..

مش ع المكاتب لا _ ولافي البراويز الصور

القرش صعب صحيح وله في السوق أمور

كان الشرف موصول بنبض القلب لو حاف الرغيف...

القلب كان في العشق ريف..

على سهوه فجأة الطقس واللحن اختلف

العرض أصبح في دواير المسافة طول

التقل خف

حل العطش بقلوبنا. نبع الحزن والحب النبيل القصد جف

حين جذر تربيع الكثافة على المسافة رق شف

اتلخفن الدور والمسار

الكون عكس فجأة مسيرة القالك خَاف المدار

ووقف على حيله كتور الله في برسسيمه الحمار

قرنه عجز عن حمل شیله _ فدار ولف

لا أصبح المطر شتا. ولا الصداقة شط حلم صيف.

المستقيم القلة صار أشبه بشبه المنحرف

والمستديم العلّة ما عاد زي غيره مختلف

صبح العلام العلم ما هو غير وسيلة للجهول

علشان ينول الفضل ويطول العلا

العقل نعمة بهالة وسبهالة..

الحق حج لكل صاحب حجة من أهل الحجا يدق الطبول

لذا باعتراف لك. باعتراف. برغم كل الاعتراض..

من كل صاحب اجتهاد عرف الحقيقة. أو قرف الديك في عشق النعجة باض.

وأبو الفصاد أصبح فصيح القعدة عليه الاعتماد

الفيل في خرم الإبره ماشي على الحبال.. يسبى العباد..

نصب الخليفة الزينة فوق روس الجبال.. يحمى البلاد..

جاي لك بنفسه لفِردة الجزية وتقسيم العشور

غاسل ضميره الحي من كل القشور.. قافل بيبان الاجتهاد

ضامن هتافات العشش قبل القصور

يا حضرة الآمر.. أنا المأمور على كل المداين والكفور

باعلنها.. إن الكل صار واحد ورهن بكلمتك

اللي ما صله الدور هَاكَ..

صبح الغراب باللك

والسبع برم لك شنابه عشان يهو هو. اك.

الملك لك لك لك اك

مَلك الورق بالبنت قش قش لك..

الخلق زَبطت خطوط سيرها علي مهلك

دبح بعير النبي أول ما بعبع لك.

فرش الحصير ع المقام العالي. باع ـ باح لك.

وأنا ابن مين في البلد.

علشان كمد أو كبد أرفض أو أسمح لك

وأرفع عينيه ولو خجلان ابحلق فيك.

وسِيدي من غير مؤاخذه وشِرْك _ سبّح لك ..

لذا باعترف لك.

أنا يا للي عشت احتمي م الشك في العلامة بالقبول

وبانتظر قيامة القيامة مهما كان الانتظار يطول

أحلم أهاجر بالوطن لأجمل الفصول

أحظى في جناين حضرته بلحظة المثول..

أنا الضعيف الملهى على عينى الرغيف

اللي بكافه الوصايا والشرائع المأصلة المنز لات ملتزم

بأعلن بإنى من النهاردة منهزم. قدام مزايا حضرتك.

منهوب. لأخر صيف شتا ربيع خريف ـ سلمت لك.

مغلوب بأسرار ضعفى مش بقوتك

مغصوب. وما استسلمت لك.

علشان أنا المو هوب لفجر بلادي _ أتحمل عذابات أوّلك..

حتى ولو ليلى الفطيس مد وحَالك

مش ح اشكى ليك ولاح أسألك.

ولا راح أطاطى قصيدتى حتى غصب لك

لأن أحْرة حد ما تطوله إيديك.

مر هون بقدرة قلبي يرفض إن عقلي يقبلك!

النيل ما يعرفش عبري

علم بناتك يرقصوا نينجا

ويأكلوا لحمة ف موسم السردين ينسوا ميعاد شم النسيم وعاشورة النيل في آخر رحلته نسّاي..

يغلط في بعض أسامي بعض سنين طيبه قلوب العجايز عيبة مشهورة

البلهارسيا سارقة مني صباي

يورٌ حلفا البرع البشنين

يرق قلبي شوق يشق حشاي

لكن في عمره ما يخلف المواعيد

لازم يعاود كنه طفل وليد

يغسل هموم الشط من الغريبة السقط

من خيبة الشيبة يفك القيد

يفرق الرحمة علي الموتي صباح العيد

فرح بلأقاي

فاغسل بناتك م الحبأ والطين

طهر عيونهم من هسيس النخل والصفصاف

ومن صلاة اليمام العاجز الخواف

يمكن يبصوا الصبح في عيونك. سلامه الشوف.

ما يلمحوش التوت ولا الياسمين..

اللى انصبغ بالدم يوم كان الخجل والخوف!

- - -

عود بناتك يكر هوا الخضرة.. ما ينزلوش الريف..

لا يعرفوا ضليلة الجميز ولا روايح الكافور

ولا طعم حب العزيز..

لا ينزلوا الشعرا ولا شربين

الفلاحين ليلة الخميس في القرافة

بيصحوا لا ولاد اللي ضاعوا في سينا

من قبل ما يخشوا دنيا _ بعد ما نسينا _

يجورٌ هُم في ليالي الصيف.. من العذاري معطرين باللمون..

وبريحة البرسيم وطعم الجوافة..

حذر بناتك من وساوسهم. يتتوروا وينسوا تاريخنا الخرافة.

ويحفظوا المزامير وسفر الخروج. إيه اللي نابنا من بهية وقحافة.

غيط النصاري زي كوم الشقافة

الحزن بايض في عشش لاتتين

وإذا ابتليت بالجهلة سايسهم

يقروا القصايد م الشمال لليمين

شى الله يا سيدي القطب يا أبو المعاطى

يكفينا شر المستريب والخاطى.. اللي غدرهم في عرايسهم

ما رحمش لا النوبي. ولا الدمياطي..

إبعد بناتك عن رصيف المينا.. لا يدندنوا بأغانينا ولا حواديتنا

ولا يسألوا قلوع المراكب علينا

كل العدا متشمّتين فينا. بيقولوا روحنا للقضا برجلينا زي عادتنا

ويكتنبوا الجرح اللي واجعني.. اللي هدم بالغصب عتبتنا

قسم ما بين البورصة والديانه لقمتنا

الكدب لوعنى

واللي رضع لبن الحرام ضيعني..

من صغره بين الورشة والأوتوبيس مقطعني

كانت في قلبه » إلاّتة « مخقية

ما قدرش يضحك ضحكة الأطفال

ما طاقش كتفه جاكتة العمال

وإما كتب عيب وفرّعني

مزع شيلان أمه في سوق الحسبة

قصيت ضفايري لما جوعني..!

وأنا عمري ما كرهتش أحد في الدنيا

ولا نكرت رغيفي م اللي جعان

حتى اللي باعني في غيطان النفط ـ بيعني ـ

توب العز وخدعني

أنا اللي طبّعني طبعي من زمان بحاجات

عمري ما أنسى اللي فات

في ساعة الفرحة أترّحم على الأموات

أتمنى أخلف ولد وافرح لخانف البنات

لذا شيلتهم في عيبيه حبيتهم

ومن الرياح الشارده خبيتهم

طهرتهم م العيبه والريبه. بلولي قطر الندي في الفجر حميتهم

عليّ الحلال الزلال.. مش علي الحرام ربيتهم!

لذا شيل بناتك عن براح صدري إرحل بهم للشرق أو للغرب عن بيتنا عما قلوب الأبهات فتة خايفة عليهم من غضب طيني وقلق صبري من فقر فلا حيني من قهري..

من يوم يوافي النيل في مواعيده

يفك قيده. ويزهر شقا عمري على إيده..

فينسوا في نهار عيده..

ويغنوا »عوف الله! «.. بالعبري!!

نوفمبر 94

آخر تخاريف الخلاق اليائس في ليل اليوم السادس

عفوا يا حضرات من أصحاب العزة ومن نكرات م القِله أصحاب العله الهمل واللي ما فيش للعرة الكمّل للأصحاب النظر الشيش بيش م البكوات الصبوات.. للمضروبين بالبلغة ورا لأقم العيش

عفواً.. يا أصحاب البال الرايق من عسل الريق

ويا أرباب الصبر الطيب والهم البايت. والرّزق الضّيق..

عفواً يا كل البشر.. المخاليق

أنا أصلى نسيت.

من حقى أحياناً أنسى اللي عجنته وخبزته بإيدي

اللى سويته على صورتى عشان يحفظ أناشيدي..

يسبح لى ويشكر فضلى يتغنى بحكاياتي

يعزف على أوتار رباباتي.. يتغزل فيه

يوْفي مواعيدي ف صومي وصلاتي

ويهلل ويكبّر بيه يضحى أعز ما يملك. في صباحية عيدي

عفواً. غصبن عني نسيت. ما حضرتش في اليوم الأول

فندمت لإنى ما جيت..

خُفت. فما لحقتش قطر اليوم التاني.

قلقى كان أكبر من خوفى

نسياني أقوي وأكثر من أنى أتذكر...

فاستحييت من عجزي اتخطى ظروفي

ونويت أحضر في اليوم التالت..

ومعايا حزمة أشواق من حرمان اليوم الأول

وغناوي من رعب اليوم التاني...

مش ح اتحجج أيها حجة ولاح اتجمّل

فجأة الوهج العشق انطفا واتحوّل..

خجلي منكم أكبر من خوفي عليكم..

ندمي غوّل في دمي.

باتسوّل زرع إيديه. وأول ما خطّه لساني..

تعبان غالبني طبعي الإنساني.. وكإني ما كتبتش فيكم حرف

ما رسمتش ليكم شجرة..

ما نورتش في الليل الحالك نجمة ولا قمرة..

ما قريتش عليكم حدوته وحيدة. ولا قلت قصيدة

يا ااه..

يا طول المسافات اللي فتحت حلقها بينا

مش سامع فيكم عصفورة بتضحك...

ولا طفل في حرية بيبْكي

مع إن مادوستش ليكم على طرف...

ما خرستش على طرف لسانكم حرف

أمال ليه عدي اليوم الرابع وأنا ضجران

ز هقني . كرّ هني في اللي عملته أكتر وأكتر

ضرسني اللون الأخضر.. موّع نفسي ماء النيل الكوثر...

أخرسني العسكر

مع إنى كان ميتهيألى أن أنا حاجة _ وأكبر

وأنى عامل حاجة مهمة ولها عازة

ما يقدر يعملها سوايا لا قبلي ولا بعدي..

عفوا.. ما طلعش ف يدّي. فحطيت نفسى في مغاره صمتى..

فضّلت لصوتى يكن ف عِب سكوتى..

وراهنت أنى ح اتجلى عليكم في اليوم الخامس.

وآديني. من صباحية ربنا فاتح عيني.

باتأمل. إنى بعد ما كمّلت لكم ديني..

راقد على سطح سريري المية ويائس

لا معايا. لا فرشى. لا غطايا. ولا فوقى ولا تحتى سوايا

صدري وضهري وعضايا ما فيهم مطرح خالى..

من قله نصَفه. لقله زوق. لرباية.

من قلية حيله لكفر لعصيان لخيانة

ياااه..

قد كده كانت ردة أفعالي جبانة

استهلك عمري ياما مشاوير.. حمير وبغال..

حراس ودفاتر أحوال ظباط وافنديات..

قد كده اتمزع جلدي.. بالحارق والبارد والفاتر...

ولسانى اتلسوع بالمر وبالحلو وبالحادق

وعلى أكعابي اتبحترت السنوات والأيام..

الصعبة والخايبة

شعر وأغنيات وحكايا..

آه ياني..

اتمزعت الأحلام في القلب واتقطعت الأسباب

اتقفلت لابواب

الفالت فات

البايت مات

والغوغاء السوقية فراكة طين ايدي

باعوا هرابيدي للشعراء الأندال الدهماء من مواليه وعبيدي.

الزعماء امتصوا وريدي..

أصحاب النياشين والخطب التاريخية واللي مالحقوش يبقوا أصحاب حيّثية الكل كليله اتبوّلوا في أطباقي باسم القومية وانتعلوا دماغي ف أيام النصر بإسم الحرية وداسوا ف قلبي مع كل هزيمة بعصبية مع إني لا قائد طابية ولا صاحب طبلية دانا حيا الله ورا كلمه في قصيده بتطلع ملاييني

آديني. مفنجل عيني وباتأمل.

باحاول أعرف واتعرف.. بعد ما كمّلت لكم ديني..

راقد عى سطح سريري الميه ويائس.. متعطى بصمتى..

بعد ما عشت سنين القحط. نجيت من غرق الطوفان..

ومن نار الأخدود.. وحصار بيروت لبنان...

من غدر يهود وجنود الرومان

من بعد ما شفت بعيني الرجفة. والصعقة ودبح الناقة

ونجيت من هوجة الحرامية..

وخرجت سليم النية من البير والسجن الحربي عبرت متاهة سينا فلتت بجلدي من قمة إنتاريو.. وعاصفة الصحراء..

ومن مذبحة الحد الدامي وكيد النسوان

من قتل الغيله الغدر علي منصات الجيش أو في حواري العشش الخيش.. من سوء النية وم النسيان..

ويادوب دلوقتي. والعمر بيشهق آخر هسه

في اليوم السادس.. بافتح أوراقي للشمس..

بابري قلمي من الأول.. وباجهز م الحمأ الطين الخمران الطاهر..

لجل أسوي عالم على صورتى

وأحرر روحي ووقتي مما كان.. وأتحوّل

أبدأ أعيد اللي نسيت أعمله في مواعيده

ألت وأعجن وازيده لكن بإرادتي فعفوا

خشوا جحوركم. وارتعدوا..

يا للي قصفتم قلمي دهور وسنين..

لوعتم قلبي حضور وغياب على شقفة طين

وحرمتوني الصدق الهامس..

قفتلتوا ف وشى أبواب الغفران والرحمة.. يسار ويمين..

موتوا ف جلدكو وارتعشوا ارتعدوا..

لأنى نويت أملك أمري ومش نساي..

مش مكسور العين ومؤكد جاي..

معايا كافة مخلوقات عمري.م العله القلّة المرضي المنتهكين

العاهات الممسوسين المغلوبين الأمر...

المقلوبة حياتهم وش لضهر

المقتلوين غيلة وقلة حيلة. وغدر

لجل ندور من تاني ف ليل المغتصبين عن قمر الحلم الضايع وإن حكمت راح نشبكه نحبكه نجليه من لقم البؤس الباقيه ومن أوهام الشعر البائس العشمان في وعد المبدع للإنسان _ في اليوم السابع!

كرابيج علي ضهر الوطن

كرباج علي بطن أبويا.. كرباج علي ضهر أمي.. حين خيروني ما بيني.. وما بين همومي وفني اخترت أكدب وأغني.. صِعِبت حقيقتلك عليه بحكم ضعفي وسني لزمت صمت الأرانب فخسرت ما اتبقي.. مني!

سامحنا يا محمد

إذ إحنا مستضعفين في الأرض بإيدينا

أكمن ياما ف حزننا غَيّينا

ورضينا باللقمة حاف من الأطراف. تكفينا.

نمد رجلينا على قد الغطا يعرينا

وبكيفنا حلبوا الغجر من بز أراضينا..

توب الخليفة.. زكاة الغزو والكسوة

طلعة رجب تشريفة المولد.. بين العيدين والنص من شعبان و نفقة السوة.. و التضحية بالخرفان..

رمضان ووهبة جواري الأنس والخصيان شوار عروسة اللي ما تتسمي _ قطر الندي يقيلوا ويناموا بعد الغدا ..

وإحنا لغدر العدا سهرنا ولا غفينا

لو دين علينا. ولا سهوة شقا. ننساه

وإن كان لنا _ عمد ياما عَفينا ونسينا..

وإذا يغضب النيل علينا.. يطمع مشايخنا فينا قبل أعادينا يشوونا علي جمر الحرام والدين

إحنا اللي بالعشق شوق للوصل ما عصينا...

صومنا جميع المواسم أسوة بالمساكين...

يا محرومين م الأمان ننكر أسامينا

ويوم ما بتضيق علينا. لا لقمة الذل ولا للسحت بصّينا.

ولا إيدينا لخسيس الأصل مدّينا

ولا لغير اللي خلق الخلق _ أول مرة _ صلينا

وإن كانت النخلة مالت أرضنا ما ماتتش

والحاله حالت إيدينا بعافية مّا.. كلتش

تقدر بواقى الأمل تؤصِل أغانينا!

سامحنی یا محمد..

يا ابن البلاد الللي ذِلة استضعفت روحها سمحت لدود الهزيمة يعس في جروحها استسلهت سهل أهل الجهل فانهطلت ملامحها...

وضيعت خوف انفجار الفجر ألف ميعاد لأفراحها..

بشمت جوارحها. سامحنى وسامحها.

با حلف بها وبسماها وشوقها وسماحها

بمساها وصباحها شط النيل وفلاحها

بإسمها اللي انكتب عنوان لبدء الخلق.. باب الشرق مفتاحها..

قلبك مريض بالحق _ مش عيان

ضعفك بكلمة _ لأ. مستعفي..

الصمت مش أهون من النسيان

في أرض باعت حصير أبو ذر الأميه وللغلمان

الدم صار مية

مالله لا حس ولا فوران

وخادم اللات والعزي ماهوش إنسان...

لا الأرض مادت ولا كفت عن الدوران...

ما شفعش ليك اسم الرسول على اسمك

ولا وهبة السلطان نهار الخارجة والدوسة

تأمّن السّكة وترطب هجير مكة..

تكسر دياب الفلاه وتسلسل الشيطان!

ما شفعش ليك الشعر عند الخليفه..

ولا جرايه التكايا. وعشق خضره الشريفة

ولا رعاية حرافيش الصعيد للأزهر..

م الغجري والتتري وقرين الغول..
وأنت الفقير ابن غيطان البصل الفول
علمت فقها الأصول معني القبول بالأصول..
والواصليين بالأدب والشوق لباب الوصول
شِنْت الحمول والدين وفن القول..
وسجدت للنخلة تستغفر ذنوب الكون..
فاسك تجلي علي الأصفر.. بتوب أخضر
نفخت في طين الوطن أنفاسك..

الله أكبر عليهم بس سامحني..

يا ابن البلاد اللي مش بالسهل باقية بلاد لكن في يوم له ميعاد لابد وحتقدر يوم ماح تفهم قيمة الأولاد ـ وراح تكبر يقرقشوا الطين ولا يمدوا الإيدين للسحت ويصلوا ع المصطفي في الضر والسراء ما استبدلوش الحسين وأصحابه بالأمراء ولا طمعوا في حاجة لما حكمت الحاجة ما استأثروش بالشعير والصحرا محتاجة استكتروا اللقمة على روحهم نهار الجوع

وشاركوا والي الجباية المِش ـ قد يخجل فيراعي حق (العنبرة) الحلابة. الجوهرة (الغلابة) لكنه دون المستوي ـ بالنفط

إذ سلاطة ربنا يدخلها مع مترفيها..

كي يفسقوا فيها بالأموال وبالأقوال..

يجيب سافلها واطيها. فيحق فيها الملح واللعنة.

من ساسها لشواشيها _ فيدمرها تدميرا...

سامحني يا محمد

ما كانش قصدي إني أسكت يوم ما حكموا عليك خرست من خوفي أغلط ـ طيبتي غلبتني

قطعت ودنى عشان ما اسمعش آهاتك _ فطار دتني ..

على فين أهاجر وكل الأرض آل قريش

ولمين راح أشكى.. قصيدتى رعب خانتنى

معاويه حط بعروشها لجل أكل العيش

سدوا في وشي براح أحواشها شرع وجيش

إتملكوا من عراق الأرض لحجازه..

يسلموني أموت قربان إذا عازوا..

ويجيشوني عشان أهتف لإنجازه..

أشيل هباب جازه. ويجرسوني إذا فسرت لغازه.

أو لو هربت بهمومي لغرزة التحشيش

على فين أهاجر _ عيشِي ما طمرشي.. وربي ما غفرشي ومن ثنيات وداعى بدري ما نوّرشي

لكني خوفاً ح اشيلك في ضعيف رمشي..

لحد ما يؤون أوان الصعب. للإنسان ويتخطاه.

يطهر القلب مرة من دنس جازه..

يشوف ويحلم ويتجسد له صوت الحق...

تقرا باسم العدل والحرية. ما تخافشي..

دا العيش بيخمر عرقه بدم خبّازه.!

سماح يا أهل الحداثث من جهل المحدثين

ثرثرة مهداه إلي أبطال التجريب الرايج الفالت في الفن والأدب والسياسة. زهرة تخلف عقول العالم التالت!!

ديالوج على القهوة

وما دام سمحت لنفسك المكسورة

تغيم الصورة

وتشخبط المفضوحة والمستورة...

فتصعب الحكمة على الجهال..

وتفتري بالبايرة، باسم الجمال..

ح تقول ليه إيه. وإلا أقول لك.

لو قلت _ إن البنفسج هوّه اللي بيوّزك..

يغضب رغيف العيش وتنشف بزك

وتحزن البندورة أو تستفزك _

عجينة الطعمية اللي قرفانة من الجرسون

ولو أنت قلت _ القرنفل ريحته حرقت قلبك.

طب قد إيه راح تفضل البنوتة دي تحبك.

ويعزك الكرسى اللي متقنفد على القهوة

مستنى ضحك العيال..

علي جيبك المخروم مسافر لبكرة

بتذكره على قد تمن الكازوزه وحفنة الياسمين. على الكورنيش

يا عم ما تفتريش. وتستخن الشيشة.

مين قال دروب العشق ما بتنتهيش

دي الخيبة بالوييه وهمّة ما فيش. ملعون أبو العيشه.

مكتوب على ابن المقفع مصيره موتة مريبة

ويلفوا بالحلاج على التخشيبة _

فاستنطع صبح في إمكانك تقول أي حاجة.

بشرط تبقى غريبة وما ترويش..

تشبه الدنيا بفنجان زيت

وأمك بأرنب بري في بترينة عصرية.

تحب شبرا أو تموت في باريس

إيه اللي يفرق معاك أن نمت ولا صحيت..

طبطبت خد الوطن ولا افتريت وقسيت.

ما دمت مستقطع عقول الغلابة

وعشت خايف من شكوك النيابة _ عروسة بالماريونيت تضحك على الفلسان في سوق إمبابة.

وع الديابة في مؤتمر إبليس..

وتقول لي إن العلة مصرية. حِمَل. ترابيس

وانت المغني الوحيد من يوم ما مات الملك.

المنقذ المستحيل للفن والإبداع...

من الممل الرخيص العادي والتكرار...

الشاعر الزمبلك..

محرر النسوان من خدعة المساواة وم الحرمان وأنت بتشحت بيرة في المستنقع وتحرك الكون بطرف لسانك الأكتع

من الأتيلية أو زهرة البستان أو الجريون يا عم بلا نيلة..

مانیش زعلان أنا میت.

هو أنت كنت قدرت ع الضفدع..

لما زعق فجأة فخاف الناس.. هرب دمك..

والمهرجان بقي فرجة وفضيحة..

حين جرّ سوك علشان إيجار البيت.

وسكك العسكري على أم راس الشعر

حزنت فاتأزمت فاترجيت بتوع النفط

علشان قرار التفرغ والكتاب الأول..

أنا كنت فاكرك فأقت واتغيرت

طلعت أنا الغلطان عشان نكدي..

فضلت إنى أشتم السلطان وأنا مشلح

وفضِلت أنت زي ما أنت بقيت..

صاحب أدب ورزانة ومفتح..

ما تشوفش حتى الخشبة تخرق عينيك العورة

ولا بتلمحش وسط الخلق سوى نفسك

قصيدة منشورة ف ورق سيلوفان...

مكسورة قادرة تغيم الصورة

وتشخبط المفضوحة في المستورة.. وتلبك الإحساس..

لجُلِن ما هيش طايقة الصابون والمية

وفالحه تتطلع على الأرصف ورا الجيفة.. وعيوب الناس..

شايله بِدّعها بطاقه لزقة الإعلام وتشريفة

لجل الدخول في تاريخ النقد والتحنيط.

وهي ما بتسوي بسبب سوء الأدب تعريفة!.

مونولوج داخلى

هو أنت لو ما كتبت وإلا كتبت

ح يحس بيك الأفندي اللي بيعدي..

نفس اللحظة بقعة شمس في القللي.

وإلا المعلم داود علي قهوة العواجيز

وح تبتسم لك أمك العاجزة

اللي ما زالت نفسها تفرح بك.

وما هداش الحزن لسه محوشه الزغروطة

آدي أنت فاتح مصر من كام سنة

وغزيت جميع الغرز ومطابخ الكشري..

عمال تعافر في الكلام وتلبّخ..

بتبكى ع الحرية وأنت مكحكح

ما وصلتش التلاتين ولا خل فتش

وفاكر أن الجواز هزة سرير بالراحة وسيجارتين أنثى وذكر شايطيين.

وأن الوظيفة تمضي في الدفتر وتاخد إذن معقد الدنيا لأنك شاعر

مالكش غير في الوردة والعصافير...

وزهرة النار اللي طلعت لك في وسط البحر

تنزف كلام ممضوغ بلا افرنجي ميتين مرة

تحلم بإن يترجموك برة..

تخرج من الجرة ـ دوبلير مصري لأخوك بودلير

حامل سمات التخلف في بلاد حرة..

ما تفوق يا أفندي دالعلام كان نعمة

صعبه وعصيه وع الطبع العويل مُرة ..

فك الحروف أطلق سراح الجن والعفاريت

سر الحديث غلب الملك والسبع..

جاب الدوا لبنت الملك نفسه

وروّضه وهوّه الغشيم الطبع.

يوم علم العشاق صلاة الهمس.

والأنبيا الحكمة وبحورها السبع..

رسم لبكره طريق ولا سكة الحواديت

يخرج صبى من بين غيام الأمس..

الكلمة كانت بداية _ بالكلمة تم الكون..

فيها أمل لاكتمال نقص المريض النفس

لكن أنت زي الطوبة في الشارع وماح تسمعش

إلا لتراب الخماسين في عينيك

و لإلتباس المعنى في لسانك..

لما الهموم تكتر تحط عليك..

فتفوق ساعات تقرا ولا تفهمش

إنك كتبت مهما كتبت. مهما كتبت.

عن سر حزن البنفسج

وجمر تلج العواطف في غابات فنلندا...

الشمس دي اللي مصهرجة الكوباية في »الكاب دور «

ما ح تسوي بعرة كتابتك حتى ولو مهمومة بروبجندة..

إن ما لتقيش اللي راح يسمعها.. ولو أفندي وحيد..

الريح لحس عضمه. وماشى في عز طوبه.

يتسّند على حيطة نفق شبرا..

علشان يدوق لحسة دفا من الشمس!

نهاية محتومة

بتأكد أن قصيدتك الحرّة

ناويه بكل الحسم تلغى قصيدتى..

يا مصيبتي !!

يعني أنت راح تلغيني..

يا بالحيا تدقني.

يا بالحياء تحييني.

مجاملة للزمن اللي ضباع بينا..

أوحتراماً للتاريخ الميت المسروق وللشهداء..

أو لجل خاطر وليه فتحت فصل للأمية في سندوب

أو شاب ما قدرش على الإضراب فمات مغلوب..

ما عرفشي ياخد بطانية إضافي خطفه الجوع

أو قد تفوّت لي صفحة نقد وتخلّيني..

من أجل خاطر الناقد الحبوب يعرّيني..

اتبري لما اتعري م الموضوع

شكراً. يارب الحداثة..

لكافة المحدثين الحدّثة والإحداث...

والشكر أكتر وأكتر لحضرة المندوب

مهندس المشروع. رسول عناية لجنة الإنصاف...

من أجل فقرا العالم الثالث...

اللى بفضله اتبدّلت أحوالنا...

اترسملت حسب الدولار أموالنا...

والنفط دلدل بفضله دقن أطفالنا..

وعرف عيالنا »الكليب والساكسفون والبوب«

هذي تصاريف الزمان _ وقِبْلنا. وليسقط المعنى..

القادر اللي في وسطه حزام ح يحله

واللي ف لسانه كلام ح يكتبه يبله. ويشرب المنقوع

لكن اللي زيي وزيك خارج الدايرة وعاش ممنوع..

لسه بيتعاطي أفيون الأدب والشعر

مالهش في البورصة ولاع القهوة فضل وسعر

فعليك تحرر قلبك المأزوم..

من كل ألوان الهموم. والفكر..

إذ كل أحوال البشر فالتة..

والفلسفة والجدل. في المشكلات بايتة

سيب الوطن في علاته مهزوم..

الفرد بالفن أبقى وأقوي م الأحزاب.

وحدك ولو جوه لحدك..

ما تضيعش وسط الهموم.

إنت البديل الجميل للعادي والمسموم.. فكن وحدك..

وحدك بحرية ح ترفرف تقب تعوم.. فعوم وحدك..

أيام خرا فايدتها إيه غير نوم. فنام وحدك.

خد زهره العشق في حضنك ولا تهتم

إخرس صهيل الدم..

فنجانك القهوة بوسع الكون..

وشخّتك هيه النغم واللون..

كل البنات ليلى فكون مجنون...

إنت الجميل النبيل ما دمت نيل وحدك.

وما دمت مش مفهوم. وحدك مافيش قدك.

إتحدي حمل التاريخ الكاذب المأفون

لا قانون ولا يحزنون.. إنت القانون وحدك

في كلمتك وعد انفجار الكون

كل الحدود اتمحت حتى حدود الوطن

كاف. ونون. تنجلي في الليل نجوم سعدك.

تاخدك »باريس« على حجرها أو »بون..«

تبخرك بالبيرة والينسون..

فتعتلى عرش مجدك.

علي سديم الفراغ..

كافة قصايد تراب الفرن جيل ورا جيل

ما راح تطول طرف كعبك

على شرط تغسل قلبك المهزوم

من لعنة الحدوتة. والمواويل.

من ملزمات الالتزام المشوم. بهموم بنات النيل.

حتى تموت وحدك.!!

قنينه عايمة في نيل الوراق

عفوا.. يا قصايد الورّاق

شفتك منقوشة ورسومك عَ الأوراق

بيوت وبنات أحلام أناشيد. تناغيم تقاسيم

ليها في قديم الطعم وفيها من وهم التجديد

من شجن الحزن ومزازيك العيد

أسرتني. شبابيك ع النيل سحرتني

وخدتنى أبوابك للمواعيد اللي فاتتتى

زغاليل زقزقة وأغانى خطفتني

رقرقة في عيون الأطفال زغاريد وأماني سكرتني..

طلعت بي للقمرة على سلم من أشواق

شفته ما بين دغميشة الفجر وعطر الياسمين

لهفة منسيين عشاق

وما أضعف قلبي قدام أحزان الشعراء

عفوا.. يا قصايد الوراق..

حبيتك ع الأوراق حواديت عشاق. وكرهتك.

لما شفتك بتبادلي نيل الأحزان بشيكات للأسواق

شهادات رسمية للجري ف كل سباق!

米

لا حول الله بيا أولاد

إسمه كان على طرف لسانى اتهجيته

مرر حلقی فنسیته..

مع أنه عمره ما ريح نفسه ونساني . .

وكإن الشاعر منا مطلوب منه أكثر من إنه يغني

وينقش إسمه في مناديل الأطفال...

يتباهى بنسبه في الزمن المر البطال

يقول للخرس وللمجهولين الأبطال...

أنام الحي اللي بتخضر على شطوطه الكلمات

أنا حر. وحي ومالك نفسي

مش بايع بكره وراهن أمسى بالدين...

ولا راهنت على الضالين

سلو المرحلة غنيت لجاهين..

زاملت بهاء ورجب وأمين..

مارمَشِتن عيوني لورايا.. زي الباقيين

من باب المنظرة.. جاملت الأبنودي يسار ويمين..

خوّفت قاعود بعيون البصاصين. فشخرة.

زايدت على حجاب لحساب تجار الدين.. مسخرة

وعملت خدودي قنطرة للشعراء الرسميين

زايدت على التعب الشعبي

خاصمت الكل أيام الزنازين

من أجل استكمال حيثيات الاستبدال.. لاستهبال لاولاد..

أتصورت وبالألوان على عَتب الموال جنب فؤاد حداد

في بلاد ما تحفظش من الشعر كتير

ما بتسمعش إلا طبل الأمجاد... ترقص في أي ميعاد علي زمامير الأعياد بالصاجات الرسمية تتسول ع الصبحية عطايا الأسياد...

وتحل بطول الليل فوازير الديمقراطية

مالهاش في الطيب أي نصيب.

لكن بقى ليه..؟

علشان اتمسخرت بحرية على شعر سمير!

米

مهما طرت بأناشيدك فوق جناحات الأحلام لونتها فراشات غنواتك بعجيب الألوان.. وغريب الأنغام مهما عُمت علي ضهر قصايدك في بحور الأوهام دوزنت علي أوتار الشعر الحكمة..

حررت الصور الشعبية من أسر الأوزان...

وغزيت في زحام مزادات الحرية خُن ثقافة الاعلام... الله عليك يا غريق...

إسمك مش ح يليق إلا للإمضا في كشوف العطف.

واستمارات المنح الخطف..

وما دمت بتزحف ورا كلماتك تحت الأقدام

ح تكون إيه والمنفضة في إيديك. إلا خدام..

بتسدّد بابتسامات الخوف من بكره.. رجلين الكرسي النكرة..

اللي سمحوا لك تكبر في ضِله وذاله. خصيان الحكام.

القنينه الفارغة..

مهما كان شكلها لونها وسعرها.

مش أكتر من قنينه وفارغة.. ح تدق عليها بضهر صباعك.. فترنّ تملاها بالعسل الصافى.. تحن..

تعبيها من النفط الخام تسود. تكن..

من ماء النار .. فتئن ..

قنينة من ساعة ما كانت قنينة. لا تصغر ولا تكبر...

لا فرحانة. لا حزينة.

قرية زي مدينة كل ما تتعبّى تكركر وتبقبق وتزن..

ينقلوا فيها الزيت الصايص..

زي ما يحبسوا جواها الجن المايس..

ما تحسش قلق الزمن الهايص..

ولا خوف الزايد م الناقص

ترجع دايماً قنينة زي ما كانت فارغة

ترعب لو مكسورة. القدم الحافى..

وتخاف حين تستخدم للزينة ساعات. من حَجَر الزمن الخافي..

لأنها في كتير م الحالات

راح تتطوح فجأة على مد الأيد. فوق أقرب كوم نفايات!

تعددت الأسباب

في موسم عطش النيل

الواد الطيب جدا _ عاطف _ مات في قلب الليل...
راح في شربة ميه يا ولداه

. . . .

لقطة حزينة كبيرة بقد الآه.

على خلفية من كسر المواويل ..

فيها ملايكة بهدوم بيضا ملامحهم شريرة..

ودكاترة ف كل فنون الإنسان الأول..

قطع فجائى في مونتاج الفيلم العبثي..

فالسينما من الأصل حرام في شريعة الله..

إكفي ماجورع السيرة ياأشرف..

إياك م النبش ورا التفسير..

الحزن الأنساني مبرر كافي لكافة تهم التفكير

لاحول الله. قدره وقضاه.

إتحرق النيجاتيف واتسرق الحلم..

بتموت الأشجار في عز صباها على الأرض المحروقة

حجج. التنوير الخايفة على الرصفان مدلوقة

حياة الشعرا جميعا مسروقة...

الطب اتقدم علي جدول أسعار الين

والعلم مباح.. ويحِنّ

متاح حتي للعامة في الكتب الصفرا وكراريس الجن

حِبّك أصبح بند أساسي في در اسات الجوع

وطنك بقي برة الموضوع

قلبك هذا الموجوع..

مرفوع من لستة أرباح البورصة.

أحلام عمرك ترس ف ترسانة آليات السوق

كافة طرق الموت مفتوحة على فوق..

لفيزات العملة الصعبة.

تمرق من صالات البنك لقاعات الدرس

لدهاليز المستشفي. بيع وشرا..

شهادات لافترا كلها أسباب للموت

حيثيات لسيادة قانون الرمل الأوسطى

فاتشحططي يا بلاد الأحلام الأولى. إنما لاتغلطي..

ما احناش اولاد الغولة..

مازال اللنيل له جايات. واسمك مش لايق للموت.

حتى اوزيريس ماكانش مجرد جثة في تابوت

ربنا رب حیاه..

خلق البني آدم علي صورته ولصورته هداه..

سمّاه أحياه وحماه

أعطاه القدرة

يزرع قفر الروح وصحاري الأحساس بالخضرة

يعطى للون والخط بهاه. اللضي سناه.

يتملتى جمال الحرف الأبدي ويفكر في دلالاته.. يعطيه معناه..

يفتح بخيالاته ابواب الشوق على بكرة..

كرمه بالعقل اللي تنوّره.. فكرة تفكره..

ذكري تذكره..

قدره تقدّره ع اللي بيقهره..

من غل الجهل اللي يكقره..

لنعومة الكدب اللي تخدّره..

للقهر الفقر اللي يحسره ويذل سماه...

لكنه بحُبك ما أضيعُه.

الطفل الطيب ياولداه.. رغم ماابدعه..

حبك بسموم الرّقة رماه جهاك ضيعه

عشقك بقى الف سبب لشقاه.. حجّة لمصرعه

.. ياللي انتي شرَعَتي العشق حياه..

لكنه الهول متربّص ع الأبواب..

عاطى لنفسه مهابة رب الأرباب..

علشان طلعت له الأيد الألف..

بیغمی عینیکی بمیت کف..

متربص بالمواعيد

خاتم ع العقل رصاص ونحاس وحديد

ببنوك ذرية وأسواق للدم وأسباب للجاه.

بدكاتره جهابذة أصول في العلم

عمال بدقون بشوات أوباش

خواجات وخوجات وشيوخ وحناش

بوتيكات شركات أموال ولبان

هم مایتلم مداه. وان بان

ملِك الأحرش أبو طبل وشاش..

استولى على غيطان المواويل

عكر برمال البيد النيل..

غوّل في الجامعة.. وفي الجامع..

استقوي في غرف الإنعاش..

راح يتخطفنا واحد واحد..

يقطفنا أفلام وجرايد. وقصايد م الشعر الجاحد.

جاياته أكتر م الرايحات. ح يعيد ويزيد..

خرابیشه ح تنزف فی جروحی..

وح تطلق خفافیشه تزاید ع الطیب عاطف _ لو عاش وأبو زید. المصري. لو مات.!

ربو ريد.. ^المصري.. تو محت..:

العشق من غير أمل

كل الأماني في الغرام واردة...

فما تفز عيش من شكة الوردة

كاقة جراح الهوي مقدر عليها تطيب

الحب زي الحزن لحظة ميلاد ومشيب..

شيء من ده.. ومش من ده

وانا مش طبيب للى جَرَحه العشق أو نصَفه.

أنا قلب له رجلين

ماشي علي حد مسنون اللسان والعين

شهروا الخناجر عليه

صقين على الجنبين.. حتية ومعاندة..

والشاطر اللي ح يقدر يوم يحل اللغز.. ويجيب كتاب النيل

من أجل أن ينفتح شباكك المهزوم

في يوم معلوم..

تشوف ضفاير الخضرة سبت الحزن

اللي الزمان لو قطفها النهاردة. بيتم العشاق.

مكتبو لنا نلتقي.. مكتوب لنا بالفراق..

الله يجازي اللي كان سبب الغرام العشق منذ البدء..

إحنا مؤكد مندورين للخوف..

يمضعنا ويمُقا . يعدمنا ضي الشوف .

ويسرق العمر زي الشعرة مانحِسوش. لو يندَه..

فما تغضبيش من شكة الوردة

آهة الجسد شهقة لرد الروح..

نَية الجروح صاحية حية ودمنا مسفوح..

لكن أماير الألم في جمرها الصاحي..

وعد لجناحي تحمّل. كل شئ حيروح

طول ما الحياه.. لسّة قادرة بدموع الأمل تتدي

وتبتلِينا جروح..!

من تراتيل الحنين لجحيم عدن

إرْميني ف برزخ (صيره) المالح

غرّقني في المد الرايح

دحرجنى على صخر (كرتير) الأسمر

كحّلني بالرمل الجارح..

لسة دم رفاقي على الجدران..

شمّمني روايح (خورْ مكسر)

ملعون أبو أم العسكر

فوق كرسى العرش أن كانوا.. أو خدمة عند السلطان

كنا ان طلع القمر السكران في ميعاده

بنغنى ونغضب من بعض

كنا بنعشق موت. نكره موت.

ننتآلف نتحالف ع الموت..

لكن كنا بنتقاسم الأحزان مع بعض...

ونراعى لحد الموت. نزوات الأرض!

(ليه حبك لما ملكني.. هلكني..؟)

إنا كنت مآمنة كل العشاق...

ليه أو لادي ما آمنت ليش..

أنا كنت مصدقة كل الأشواق.. قلبي ماكدبنيش

ليه أو لادي ما أمنت بيش

ز هقوا من آهه وجعي فاستعجلوا موتي؟ طمعوا في قليل قوتي.

والأغويتهم قلّة شوفي وسمْعي

فراهنوا علي سكوتي؟!..

الكدب العربي منجي وله خرابيش

والصدق بألف قناع..

الخوف الملكي بيتهجي حروف الأتباع

كلمته عند البياع

مالهاش غير سعر مؤجل. مايكتيش

والعلة بتعدي. لكن العافية مابتعديش..

(كان حلمك أخف من الريش)

أتبعير من كتر ماعكر ساحتنا الريح

حفار المقبرة لو طالع _ غرضه مرضه _

نازل برضه مابيعا يش

فاعذرني..

خدنى وابدرنى في مسيل السيل..

اللي كل مابيحِل الموسم ـ يغدرني

إعجني بطينة (أبين) ومرابع (شبوه)..

سمّعني أغاني (القوميندان)..

افرشني تحت سنابك خيل الفرسان الأسطوريين

الطالعين من فجر (مُكلا) قاصدين البحر

يصل واللمطرة في (سيئون) يسكروا بعصاير (سو قطره) وعسل الليمون يوصلوا قلب الانسان العاشق في نبض الكون المجنون اكسرني زي العود الناشف علي أول حجرة حزينة من آهة أوجاعي اسقيني ماتحر منيش إحرقني ببخور الأرض المسكينة اللي جسدي بأرواح شهدائها.. مسكون!!

إتبسّمي

رسالة من خط الحدود إلى سلمى الجزائرية..

الحزن مش لايق علي (سلمي..)
فاتبسمي كل السكك ضلمة
وطنك ماهوش دريان بحد
مطرود علي حدود الزمن والحد
مش راضي حكم السنين.. محكوم عليه بالامتثال الخلف..
الغمة صارت من سمات الأمة سبت وحد
والرمل مابيرحمش خلفات النخيل
حدود بلادنا في عيون الخيل ـ رَمَد
والليل بتاع العاشقين القُدام..
مات فوق شطوط النيل كمَد

فما تحز نبش...

الحزن مش لايق علي عنيكي

أهلك على كل الشطوط متبعترين بين القبايل

والشعرا سووا الهوايل

من امتي كان للخلق حق علي التراب.

شفنا العذاب.. من يوم عرفنا القراية خطية الكتاب

وسألنا عن سر فرض الكفاية وعِلّة الاسباب.

الريح وبس _ هي الأحق بكل أطفال العرب..

كافة حدودنا مش لأعداءنا..

لكنها سنّة لمنع الهرب!!

فما تكتميش الآهه عند الغنا

الفرحة نص عذاب

وانبَسّمي.

الحزن مش لايق علي عينيكي

الموت ماعدش العدو.. ولا كان..

ولا المكان هوّ اللقا والفراق..

كافة صبايانا (ليلي)... وجميع بلادنا (عراق)

خطوط خلافنا واضحة بالاتفاق

كلّه على صدري طابق يشدّ في الختّاق

فاياك يا (سلمي)للبكا تسلّمي..

ولا لخلاص الحزن تستسلمي

الحزن مش لايق يا (سلمي) عليك

دانا عشت أرحل للفرح في عينيك

ونمت متغطّى بدفا بسمتك

أعطش واشرب من ندي ضحكتك مش دمعتك.

وسمعت آخر همسة في غنوتك. مش لوعتك..

ولا لأهات القهر في غربتك

لكنها شروط الزمان الأخير..

حضنك بعيد بعد الوطن عني..

فأتبستمي

الحزن مش لايق عليك _ غنى ..

لجلن مانرجع سوا في مواسم الأمطار

نحبى في حوش الدار!!

95

أوليس شهيد في الهرم

(بنيلوبي) السهرانة علي شطوط الحواديت بايته تترجّي من الدنيا رجعة (أوليس) م الغربة مجبور الخاطر منصور للبيت بهدايا من تماثيل الألاباستر وكروت الألوان كانت متشوّقة للعيش والملح النيلي... قامت مع ضي الفجر تفلك نسيج الحزن الليلي

المنقوع في مرار الصبر وتسأل مواويلي: مين قصر خط العمر؟ وبدّل مسارات القمر السّهران؟ مين غير حكايات الموج وغناوي النخل وملا بالغل العصري قلب عرايس البحر.. فرقدت زي الغولة السّعرانة

كنا بنقد أيامها علي لغز أبو الهول بنفك طلاسم حجر الكيميا وأسر العفاريت كان قلب الأعمي الشاعر كله مشاعر يركب أفراس الحلم وللحلم يهاجر ويقول.. يعزف علي أوتار (أفروديت) يتنبأ بشفاء المرضي في الصحراء الليبية وصعود الموتي للحرية.. ينشد ويرتل سير الأنبيا والابطال آيات

تسفح دم الأساطير على بوّابة مصر ..!

ليه فجأة اتحوّل شيخ بندر تجار الموت.. البيضة والا الكتكوت..؟

الوردة والا التابوت . ؟

وخرافات ونوادر حوادیت..

(يونس). مات بين انياب الحوت. ماطلعش

(باریس). لم یعشق (هیلانه) و ماحاربش

(ناعسة) هجرت (أيوب) الممقوت..

الشوك في البرية ماقتحش باسم (محمد)

ولا نخلة (مريم) طرحت تمرها. مااتهزتش. ولا (عيسي)اتكلم.

كل ماحلمت بيه البشرية أصبح للبشرية ذنوب.

مع ان إله الدنيا الواحد رب قلوب..

والرحمة ف قلبه ما ماتتِش

أمرك تخرج من صمت وفقر الصحرا للملكوت.

تتعلم إن الاديان مش رهبوت.

الايمان مش جبر وت والاسلام مش دين للموت.

الكلمة بداية لكن الكذبة طاغوت

مش دايما تلبس تاج ولا دايما بتشيل نبوت.

يوم إختار الانسان ماعبدش النار

لكنه خطفها من نن عيون الشمس..

بكفوف ايده العريانة.. أهداها للأطفال...

ساق بالحب الانهار للوديان العطشانة..

حين قلب الصخر على الأشجار

أشعل في ليل الأسرار الشريرة. ألف نهار ونهار

عايش بالعين والملح ودايس ع الجمر.

بيننت للألهة في السموات عرّة نفسه

بشريعة الحق يهتبها مش بالأمر

بالعلم وبالفن وبالموسيقي الرحمة يأدبها

ثبت رجليه في تضاريس الأم الأرض وخصبها..

وسند بدراعه السما وحآبها

أشعل جمرة ابداعه قربان للبشرية.

الخير مش ضعف القسوة. ولا الشر رضيع القوة

عصر عناقيد الحكمة شعر وخمر وكلمات

واستقبل قدر و مصيره لترابها ومات. مش مستسلم لا غضبان...

لكن راضى يدفع عمره في عز القهر...

لضحكة طفلة بريئة..

لحِسّ كمان ولطعم حقيقة...

لدعوة أم عجوزة في ليل حرمان...

لرجعة والد من ظلمات البحر لبر أمان..

لشربة مية لتايه عطشان في الليل الكرب

رّجعني لبلدي

ايه أحلي من ضل الأم الغايبة على أعتابها ياولدي

دلتني علي سكة أهلي غِرقت ف دمي..

إيه أجمل من دقة كف ايادي متشوقة لأبوابها

إيه في الدينا أحن عليه من أمي..

من الأرض اللي ف إيد أصحابها..

وأهة اللقا بتنطق صمت غيابها. أااه..

عديني البحر المتوسط وسيبوني. أقبّل طرف تيابها..

الأم اللي مالحقت كف أيديها تدق أبوابها

ولا لحقت تسأل عن أسبابها. أغسل بدموعي عذابها

أجمع أشلاء الطفل اللبناني

والجدة الشيبة اليوناني.. ادفيها بأحضاني..

يمكن تحصل معجزة رباني..

فينفخ من روحه ف جثث الموتي من تاني..

يتقبّل منى صلاتى على الشهداء..

على قد خلاف اللهجة والسحنة وحروف الأسماء

ويسامحني ولو مرة على خضوعي لأحزاني..

أنا ياللي و لادي شنقوني.. بسكين الجهل الأعمى و دبحوني..

وعدوي على سهوه بسكين الأهل المسنونة

مستقوي على ضعفى طالب موتك يا امه.

محاصرني بعيون (الميدوزا) المجنونة..

قابض بإيدين العوزة على رقبة قوتك. كاتم صوتك بسكوتك

قولي حاجة. ولو غصبن عنك _ برية منك _ مُش خجلانة. مع اتك

عايشة بتترّجي الدنيا العيشة السهل. أنا خجلان من نفسي ومنك

عاجز أعزف أحزاني مجاملة (لبنيولوبي) السهرانة.

اللي بتستنظر جثث الموتى من الأصحاب والأهل..

أنا غرقان في بحور الجهل

وانتى غرقانة في سنين القحْط المتهانة.

باحلم لك برجوع (اوزيريس) عبَثاً..

من برك النفط الدخنقانا.!!

بإسم بهاء

القاهرة خارجة في عز الحر . طافحة آهات الحزن على صدرها.

بتعلم الذاكرة _ ياطول صبرها _

تنسى مرار فقرها وتتذكر الأسماء..

القاهرة _ الملهّية في الاسواق. وفي الشرا والبيع وخدمة السياح.

القاهرة النسّاية كل صباح..

هَمْ الليالي اللي عدّت فرحة والاجراح؟

القاهرة القاسية عديمة الدم. صابحة بتسأل لهفة ع الجرنان.

مش قادرة حسرة وخجل تنطق »صباح الخير «

ولا تكابر وتنكر إبنها الإنسان

صاحب كرامة ومصطبة ولسان!

ياهلتري لسة الولد نايم؟!

أمال ده إية اللي مبكي الريح؟.

سنين تعدي عن الكلام صايم. والكلمة علقم في قلوب مجاريح.

القاهرة بتسألني. أعمل إيه؟.. قلت لها زيي _ إكتِمي وخبّي..

قالت لى خايقة. طب انت خايف ليه؟

قلت لها أهلى بينكروا حبى..

والشمس جُمرة بتكوى في الأسفلت

وجمرة تاكل في سطور الكتب

مافيش شجر له ضل أرتاح فيه..ولا قلام له صبر أشرح له..

الكل ملهى بالفرح بالغضب

وأنا اليتيم الأبهات والعَتب

على سهوة غدره السنّ مات صاحبه وشل إيديه

لما السكوت شوق للكلام غَلَبُه.. وهداه جميل أدبه ماهانش عليه.. فكتم في قلبه مابلاه من داء.. القاهرة الزحمة عديمة الحسّ.. خارجة في عرّ الحر تتألمّ.. واكله لسانها وخايفة م الأنباء ياما شوقها تتكلم.. لو تستعيذ م الجهل باسم _ بهاء..! لو تستعيذ م الجهل باسم _ بهاء..! (جزيرة بدران 96)

غنوة في حب الوطن

مطلوب أغني النهاردة.. غنوة في حب الوطن.. ياهلتري.. مين اللي راح يعزف علي قلبي حروف الهوي كنب الجرايد؟ والاحنين القلب للجميز.. أنا مش علي كيفي باتحير.. عشان أختار قلبي وتر قايد في جسمي النار مشدود بدم وتار ودمعي عزيز.. وعلاتي كربتي من غربتي في الدار..

مين زينا استموت في حلمه اللذيذ

وشكر لسجانه شوم العسكر الجهال...

وهمّه تحت السلاح.. خدمة لروس المال..؟

أنا كنت عَيل برّي في حارتك.

سرَ قت حق اخواتي م العسكر وم الأغراب

فرنساویه وتراکوه مسلمین وانجلیز

فرقت عيشى الفقير المر على بحارتك

يوم انهزمنا وعرابي هج ع المنفي

وعلقوه في رقابنا _ طوق الهزيمة اللذيذ ..

حين قسمونا غنيمة بإسم الستقلال...

ضاع دمّى بين الممالك.

ماكنش لسة بقينا شيوعيين. ولا حَرَقنا اللّ يمبى..

ولا كفرنا بحق شم النسيم

فطمونا نقرا الفاتحة لابن النديم. والكرسي لمحمد على..

يكفينا شر المخبّى من الهوي والسياسة.

أنا اليتيم الكسير القلب مش قدك.

رباية الفلاحين.. دريسة القطر اللي ماركبتوش

مكروش ورا اللقمة مافر قتش يسار ويمين

هتفت للثورة وللنحاس..

وغفرت ذنب الفقها والسياس..

فرحت لما الجيش حرمني الملك. ابو وردة ع الخدين سليل النبي.

وعشت عمري الغبي ماعرفتش اشكى لمين..

ضاع نص رزقي اللي على قدي مابين وما بين

نفقة معونة الشتا وإزالة العدوان...

وعِرْس قطر الندي وليالي راس التين..

عترني قلة بختي في المكنة كلبت عمري.

وقلة التصنفة ساومتني على جراحي..

إذ كنت لما بتاكل كلوتي العلّة. وقطني تاكله الدودة والبشوات.

من زهقى أدعى الرحمة للأموات.. والنصر للضباط..

لرجْعِة الزعما من المنفى وم الفلوات..

أبات على لحم بطني.. وأنا باهتف لمجد قديم.

عشمان أبيع أرضى ذلة. بس أوفى فروض الدين.

حدفتني قلة حيلتي على البورصة.. رهنت النيل البدو ضحكوا على أولادي بفروق الحظ والعملة ساوموا علية الخواجة..

دوّب لى حلم السّد في الخمسينة..

ووهب لى تمثاله اللى ع المينا

يقسِم معايا مكاسب البالة.

الكورة بتت في امري أكتر من المفتى

ما انا ایه سوی شاب طایش قِلة و کلیقتی

صاحب مزاج فقري ولسان قوال..

فنان على قد حاله يدق باب السما..

يوزن تاريخ اعداؤه بالموال..

يغنى للقلة وبلح زغلول..

للعربجية القرارية وقِدَر الفول..

لسعد باشا اللي راسي يجدّ ع الحالة.

واللي مايكر هشي قد الاشتراكيين

وإن كان عاهدني على أنى أحب الوطن. واكرَه الإحتلال..

(سينا شراع السفينة

لولى يا لا للى _ وجمّعنا صليب و هلال . .

ع البال يامصر وجوّه قلبي تمللَي)

من عهد مينا عملت في حبك اللالي

ليه الأمل نشف في حلقي الرّيق..

وليه فاتونى الكل ساعة الضيق

إشمعني يعني طريقي اللي مازيه طريق!؟

وعدوني بالجنة سنة ألفين

وبدّلوا لى القمح ببلاستيك

والورشة جيمناستيك.

وجيشوني لجل يخزوا العين..

م البوسنة حتى بوابات الصين..

ومن صومال الجوع لحفر الباطن..

قشّة لكل غريق..

وانا المواطن للشديد القوي..

كم كنت فاكر راح ادفن همّي في المحاريق

كدب الصديق ضيعني..

كافة مسافاتي حاصرتني تراجعني

وجميع مساحاتي خرم الإبره من جوعي..

لا الصلب نشف ضلوعى.. ولا الحريق جمّعنى..

ليه الف ميل الخلايق كلها بخطوة.. وانا خطوتي تعكز وتوجعني.

قلنا استبينا ورضينا الهم باستحياء

أتابينا من كل بُدّ لابد نبقى اتنين. شعب براسين

أو قول راسين ع الكتف _ انا الرجلين

نكرات ودهماء كشوف تتشابه الأسماء

واصحاب مقام عالى صفوة مثقفين زعماء

في كل نكسة لهم قد المماكسة.. جيوب.!

صرخت من كل ما بي ناديت.. ياعم (جمال..)

على أي جنّة زمر ياخالي سايقنا

قال العدالة طريقنا يافتى وحقوقنا

إرفع دماغك لقد ولسي زمان الجهل..

باسمك ساوينا كافة الطبقات إذا كلّنا عمال

أشواقنا للإنسانية حين يزينها العقل

نَقَسْت ريشي على الباشا وصاحب المال

و هتفت له عشمان تدوم الحال. عشمان يروق البال.

من خوف بيخمش في قلبي يمد في السلسال..

إذ همه فين وانت فين؟

الباشا ركب دقنه للعسكري

فصبَح خبير مفتري. بنص عقل غفير ونص سيف عُتري..

لاشئ يعلو . النص لبه وزير

المخبرين اتعلموا التأليف.

مع كل غاره يصيروا عزوة وإدارة..

إذ مصر امّة خِيرة الكتاب

الشعرا صبحوا بضوافر ميكروفون وانياب

والناصح اللي يأمّن راسة بالبرانيط.

وكل حى استهبل التانى واستسهل التنطيط

وانا العبيط اللي وسط الساحة بطرمبيط.

فاكر بأني لوحدي اللي مابينهم حي..

وانا نص أعمَى واطرش. فافتكرتِك ضي..

الحال ألسطة ياأسطى وصدّق دفتر الأحوال..

وما الدول إلا بشر ورجال..

تساهيلها على ربنا. روّق يروق الحال. وأعقِلهاوتوكل..

حلمك مؤجل _ فيركبها اللي يركبها

يحكمها يكس ركبها كل نطاط حيط..

يقسم الرّزق على اطفاله. يظلمني..

حيلتى قليلة. وعيلتى أقل منى كتير

اتسعرت قيمتي بالمليم على الفواتير...

صغِرت قد بطاقة الانتخاب..

حسب بنود البنك والتخطيط. مصلوب على ابوابها بلا مسامير...

يايحشني الاعداء في أول قطفة..

ياتِعتّ روحي بين غفير ومدير...

يدوخوني السبع دوخات و هلكوني.. بين شرق أوسط ونفطه وبحر أبيض وقحطه..

وانا اللي منذ البداية لاسرائيل أسلاب.

وبحّجة التحرير اتبادلوا قبل الرصاص في المعركة.. الانخاب..!

وجاي تقول لي النهاردة ياسمير غني!

عنوة في حب الوطن

(في حب مصر اللي كانت زهرة البساتين

نبض التاريخ والسنين التوت وتيل وعنب وتين..

وندهة الميه على جدور النبات..)

كان مين مصدّقني غيرك ياقليل الحيل

ومين معايا وورايا ضحكوا على دقني..

الوقت فات.

ليلنا الضرير طلمس عليه موت الضمير

والحلم في عيون الحزاني الفلاحات..

من كتر ماشرب الخيانة في العسل..

وبإسمه داس الرأسمال رأس العمل..

الحلم من كتر الخجل.. منها ومنى.. طق مات..!

مارش إنتصار الهزيمة

ما احلاه شعور الهزيمة..

عند اللي ياما اكتووا جهراً بعار النصر

الريح بتعصني ع اللي ماسكها

لو حتى سمّر شيش شبابيكها وسدّ وش البحر...

ريحك يتكوي الأرض رمل وحجر.. ليلك قفل ابوابه صد العصر...

رفع في وش الفجر ميت نبوت..

القمح ماتت جوع طواحينه..

شجرك يبس حين ادمن البنكنوت.

قال الفتى فرجت بنص الأجر.. وقال بلاد الله يانفط الله..

الستر سلو الحواري مهما كان دينها

ماعدش في المشربية أي بنت بنوت

وسقط شجر الجوافة يخوّف الكتكوت..

وانا اللي قايد المسرجة بدمي..

مكران بهمى وكفن امى باخاف ما ألقاه

لولا الشبة ما عرفته يا ولداه..

أخويا ده اللي راسمني في مرايتي

استبدل الجر يون بشمس الجرن...

والمش بالشامبيون..

صبغ مشيب شنبه بتراب الفرن..

من أجل يعجب بنت مش طايقاه...

لاجئ في حزب التجمع يشرب الينسون.. ويحضر الاجتماع يبكي على ليلاه..

الله عليه اليأس لما يطيب.

يخدر الجرح من آهاته ولا يشفيه

اللى تبات به أكيد ح تصبح بيه

فلا يسألنك حداً حين تبكى غداً كان ليه؟..

و لا تراهن بضعفك حين يجسه طبيب فيشمت فيه!

كبر نافخوك ياسليل فرعون..

عمر التاريخ منه بد... الوقتي مابده...

هوّ انت كنت دفعك لجل تكون..

مش كل من قصر في طوله يطول..

ولا كل من إسمه حسين بهلول..

و لا كل من عقِل الكلام مجنون

ولا انت حتى. ان سيبتهم _ ح تطول..

يابخته من عاش بهم عاجز نظر يقدر على المقفول..

بيض الحناش فقس حمام زغلول...

زمن السجون ما بقاش..

بقى ف حساب الزعما مايسواش...

إفهم حدود الرفض والتنسيق. إنسي اللي كان يا رفيق.

يامار اعينا خواطر بعض في اللي بلاش. وحوش ياحواش..

الله لايرجعها ست الحسن في المحاريق الكومبيوتر بدل الآيه.

وبكرة شعرك توزنة الآلة

اتغير المعنى مات. وماتت الصورة..

أمك بتفتى ف مجلس الشوري.. بلاش تهويل

معانا انت والا مش معنا .. ماعدش بديل ..

ماعدش تفرق حزب يجمعنا أو ماتش في البرازيل..

اتخطّفت أوجاعنا لاربْع جهات..

كل المعاهدات ح ترهن لقمتك طاعة...

ويجوز يمدوا خدمتك بالساعة. بعد الموت.

أصبحنا نشبه بعض كل تنا.

من المحيط للخليج الفصحي خيبتنا...

نام الخواجة وريح جوّه خيمتنا..

كافينا خيره وشره. كل حاجتنا..

من خزنة الرشاشات لرموش حريماتنا...

وحده اللى فاهم خلافتنا اختلافاتنا

إذ بالرّيموت اهتدَي لسر ائتلافاتنا

وبكره لما يروق الجو راح يسمح

بكل حرية يختار منا خليفتنا من الأحرار

وإن كان له فيها غرض

يشعلِها فتنة ومرض من اجل الاستقرار

وسُلِمت حين سلّمت فاستسلِمت يامكار...

حمد لله الف سلامة على خيرتك.

بكره عطانا أماراته فقلنا على الثوار..

ما عدش عمال.

اکفی ماجور ع التاریخ ده وفضتها سیرة.

محكوم على النمل ح تدوسه جنود سليمان

وشعوبنا كافة شعوبنا ح تدخل الخدمة..

حق ارتفاق الشفعة للجيرة..

ندحرج البراميل. نشيل بالات الخيش ولا سُكِرته.

نشحم الموتورات. نلف تيل العجل ونعبى ضل ف قزايز

نحلال النسوان نقول مواويل.. نربّى دود الصّوب

نغسل صحون الفنادق ندفن النفايات...

نحفر خنادق في حروب العرب

يوم ما نقوم على بعض نحشى البنادق

نغربل الكمون. نفرز بطاطس قوطة للتصدير...

نربط حبال الخيل. نجهز السلطة والمرّة انصاص الليل.

نزور الانتخابات بالخبرة دورياً..

من أجل أن يستمر الحكم ثورياً

وكون مثالي يافتي مُلتزم.. ساعة يكون الانهزام.. انهزم.. النصر له تكاليف..

لكن الهزيمة بضمان العرش والمصاريف. حكم الشعب.

دمك خفيف ؟ انت عمر ما كنت دمك خفيف

ما بقاش زمان.. قلبك يحب الريف

تمشى العصاري على البحر الصغير العصر

تخش كافة منادر ها بدون تكليف...

تضرب قصايد شعر حب ف مصر

وتلاقي ناس مجاذيب بتسمع لك..

كان البشر والغجر والممسوسين أهلك.

تحب أو تكره على مهلك.

الفقر والحرية لايقة عليك.

وانت لايق على إعمامك واخوالك..

السكة أفراح بتضوي ورد قدامك.

كانت الحقايق رفايق وانتصارنا أكيد..

لذا هزيمتنا زي الدوري. لها مواعيد..

فاعقلها زين ياوَلَد أصحابها أوْلى بها..

من عهد مينا ورب العرش أدري بها

أحنا ف رحابها ورحابه جُهَلا بنتجم

البيت ماهوش سقف فوق حيطة. ولا الوطن غنيوه وخريطة.

ولا الثقافة مجلة للأدب والنقد

ولا بطاقتك طاقية ولا برنيطه. قوم خش في الزيطة.

الكون صبح قرية واحدة والمصير اتتين. لهم إله عمدة واحد..

ع الكل واجب قوانينه وقرابينه. فما تطلاعش زرابينه.

كافة اكابرنا صار دينهم على دينه..

بقى الزمان غير زمان..

وكلّ واحد بقد هزيمته عايزينه..

عقله يزينه ساعات يقعد على الحيطة

ينفخ كدة بطنة للصبيان طرمبيطة

علشان يخللي اللي كان في العلم يا قطيطة

حُلم بعدم إمكان دافنينه

زي الهزيمة فغناوي النصر يامفلس

طلتق هواك بالتلاتة. تعالى نشرب بيره ونهاس

نعمم التجربة لكافة محبينه..

وإن كنت مازلت والا هِزلت قوم غلَّس

سوق الغتائة تباته.

وكل بطاطا بقلاطة واشتِم السلطان ..!

هموم كل يوم بيوم

مشاعري مرّة. وقرفتي مملّحة.

كإنى طفل بيطروده م القهاوي..

مالوش أمل في بياتة مستوره...

الناصية زي التانية معكورة.. والعسكري مفلس ومستقوي..

صاحب مزاج نكدي وغلا وي. بيجر علي اسنانه ويغلس وعيونه محشية بقطن وخيش

سرسِبت نفسي من شقوق الحيطان

طلاعت روحي من مكانها لقيتها متجرّحة

مددتها برة التاريخ بشويش

نفضتها من الحزن والقنزحة.. وفردتها زي الرغيف العيش غطيتها بالجرنان وسبتها كما جثة متلقحة..

ومشيت ادوّر في براري المدينة.. عن (غير ذي مصلحة)! أشكيله قسوة نشرة الأخبار.. وما جري لأصحابي في لبنان (اطفال مالحقتش تكبر منذ عشرين سنة

عيونها تحت الصمت ومفتحة!)

(لناس عجايز من بلاد اليونان..

فطروا النهاردة بتوست ومربة

وسكتوا فجأة ماكملوش الضحكة...

ولاح يشوفوش مرة تانية أو يشمّوا البحر..)

غرّقت نفسى ف زحمة القاهرة...

كتمت متغصّب آهاتي ف جرحي

سألتها وانا نفسى مكسورة..

ياهلتري بتنامى والا بتصدى؟!

وجهك ماعدش حزين على الميتين...

والا انتى من كتر النعيم مقهورة..

ناموسية كحلى وصوره متمزعة..

الجحش والبردعة ف ملقف رياح اربعة.

فناجين تاريخ زوبعة..

زعما بتحرُك زي خيل مزرعة..

فرافیت بشر وبلاد..

على صدر رصفان الميدان مبدورة متجمعة..!

كان فيه عيل مالوش في هم السياسة حلف بأمه (علية) مايصدقني مهما حِلِقت ولا بئق الميه يلحقني.. ولو قشفت.. إلا اما ابطّل حكمة وحساسة..

أرضى بعيشة أهلى مادام خلاقت.

وأعيشها ع البهلي بمِش ولِقِت.

أشوف في رقبة أمي خربوش أبويا

ودمها مسفوح على العتبات..

وأخويا بيشر ح وشوش البنات..

أهتِف بكل حماسة للأهلى وللكورة...

واتمنى على غير هوايا هزيمة المنصورة...

وطول حياة اللي درمغني بهباب الزفت ..!

شوارع القاهرة

مدروزة بالحواديت..

لكنها حواديت بلا قيمة

يا امّا غرقانه ف هموم البيت..

يا إما تايهة في العصر القديمة..

米

عودت نفس أموت في هذا البلد

من حسن ظنى أو _ لِبحْتى الزفت ..

لاقدرت اربّى على المحبة الولد..

ولا فِرحت ليوم تحبّ البنت..

米

* في النفس شك

بيڤري جوه القلب

ليه اتعترنا والأمم قدّمت

ياهلتري نقصان في هذا الشعب

والا النفوس من ذلها بلرمت

* النيل ده مسموم.. ياراكبه ستميت عفريت..

الضفتين بينزوا كدب. وملح..

كلِت البارومة غيطانه.

لَطِّ طمْيه الزيت.

مافیش مزهر فی شطه.

غير عديم الطرح.!

米

* حين حكمت المحكمة.. سكوا القفص ع الحق..

هتفت ضباع الجهالة للعدالة بكيف...

الفلكة والمقرعة جزا اللي ينطلق لا..

زحْف الفَلاَع الريف

زاحفة عصور البلا..

米

* طب ليه يامو لانا..

هل دعِست في قلبي..؟

الكدب حقك. ومات الصدق على ايدك.

مزعت توب الخشا.. وحرمتني حبي..

تدبحني بعد الصلا

ترضى غرور سيدك!

米

الله الله عضمة لكلب عويل

ح يرضى عليك

في الخايبة والرايجة

ح يبصبص يهَوْ هَوْلك.

لكن الرجال ام عضمة أكيد تعض ايديك.

وهي بتبوسها. لما ف ذل تحتاج لك.!

米

* فقدت وطني علي سهوة في سوق العصر

مين النهاردة ح يحكى للقمر حواديتِك

مطر المحيط الأطلسي زاتق عنب بيتك..

طرْح البلح من هبَله بيصّيص

راجت فنون التجارة النفط بيخلص

وانا العديم المهارة نسيت مواقيتك.

ع البركة ياما م الغشم غنيتك.

(عينيك شموس المسا. حضنك غيطان العمل.)

ظنيت بأنى بالقصيدة رَقيتك

أو احتويتك في قلبي نجّيتك لشط الأمل..

كلمة شرف أو حسن نية وحظ

ضحك الشبندر لطم وشي بردة الفطّ

وحكم عشم في الرضا إني ابيع بخسارة. أو أسكت.

أهجر مراتي واكره سيرة الحارة.. أهاجر في بلاد الناس..

واما عجزت بحكم عشقى القديم

وعيش وملح وأمل في صحِّبة المقاديم

في جُبّ قلبي العاصى خبّيتِك من التجار

كما سلو أهل الهوي بين الاشتياق والصبر

عيب عليه اللئيم حبي وساق الهبل..

كان خُلِق غيرنا وأحسن. بيقبلوا التحكيم بكل وقار...

بشعر محكم سليم الوزن والقافية. فيه ريحة الثوار

سرقوكي مني. ودهسوا غصب حوش الدار..

خِزيتْ.. غَا بنى لانكسار والسنّ..

قعدت ع المصطبة كما عجايز الفرح..

أشكى مرار الرّضا. واتتشق على الأخبار.